



3
VEEE
88

Vertical columns of faint, illegible text, likely bleed-through from the reverse side of the page.

Blank page with faint grid lines.

特

門 儿 5
號 3537
卷 28

重修揚州府志之四十七

人物志二

明

汪廣洋字朝宗高郵人流寓太平太祖渡江召為元帥
 府令史累進中書右司郎中知驍騎衛事參常遇春軍
 務下贛州拜江西叅政洪武元年山東平命理行省撫
 納新附民甚安之召入為中書省叅政明年出叅政陝
 西三年李善長病中書無官召廣洋為右丞時左丞楊
 憲專決事喉御史劾廣洋奉母無狀放還鄉憲再奏徙
 海南憲誅召還封忠勤伯誥詞稱其勦繁治劇屢獻忠



謀比之子房孔明及善長以病去位遂以廣洋爲右丞相廣洋頗耽酒與惟庸同相浮沉守位而已帝數誠諭之中丞涂節言劉基爲惟庸毒死廣洋宜知狀帝怒貶廣南舟次太平帝追怒其在江西庇文正不發楊憲姦賜勅誅之廣洋少師余闕淹通經史善篆隸工爲詩歌爲人寬和自守與奸人同位而不能去故及於禍

明史一百一十七

顧師魯字惟學興化人父號東泉處士以世食宋祿不仕元師魯氣節類父早孤事祖母以孝聞明兵至率父老謁左相徐達達命指示前鋒時王信父子據沂州遣師魯往諭信父瑄怒將殺之由間道脫歸徐達征江南欲載師魯行固乞終養祖母達請於朝賜三十六戶榮養終其身

興化縣志

張長年高郵人元季以德行名於世明初禮部主事劉庸舉明經者儒達於治體者長年與新安鮑恂梁溪余詮上海顧思誠皆在舉中時年皆七十餘驛召至京太祖見之喜甚賜坐顧問一日命爲文華殿大學士並以老疾辭太祖諭之曰以卿等年高故授此職煩輔導東宮耳免卿早朝日晏而入從容坐對庶不負卿等平日所學何辭爲長年等固辭放歸田里

高郵州志

陳善字性初儀真人洪武間以貢入國學爲上舍生擢
刑部主事遷郎中在任五年獄獄明允請託俱絕出爲
廣西左參議政聞於朝數加賜賚有交趾彭布政之任
道卒無親從善以禮殯斂送遺橐於其家里人韓知事
謫戍廣西病死妻孥不克歸善給行貲使還葬焉秩滿
當代有德之者餽金二罌給爲別物俄覺其實弗及還
竟投之江遷河南按察司副使攝司事數月審決冤滯
八百餘人囹圄爲空母憂服闋復除浙江宣德元年入
覲卒於京師年五十三善生平簡靜廉慎自號畏菴出
不輿馬衣不文繡俸入悉賙人急歷官三十年操行介

然如一日

儀徵
縣志

蔣宮字伯離儀真人五歲誦孝經論語左氏春秋十歲
善屬文從學陳子山子山銳意釋經宮乃列諸家傳疏
得失進子山異之授以詩書春秋宮輒悟其旨子山謂
人曰明敏若宮雖汝南應世叔不足多也自是博極羣
書於制度沿革陰陽厯數之義無不通元至正初登第
未幾丁祖憂負祖母避地浙東以薦授行樞密院管勾
服闋授崇明州判官攝州事有聲明洪武初部使薦宮
才可備史館授翰林修撰尋擢開封蘭陽縣丞地當南
北要衝兵燹之餘寇盜充斥居民存者十二三宮廣爲

招徠一年復業五千餘戶彌災捍患掩骼埋胔通商販理冤滯安反側開學校崇德義邑人大和秩滿朝京以

疾卒

雍正志

邱民江都人洪武初為松江學訓導慕學之士自遠而

來十餘年無慮千數松江一時文風之盛不下鄒魯

列朝

詩小傳 萬厯志云洪武九年舉於浙江宋濂鄭戩以知禮薦歷官禮部侍郎卒葬蜀岡禪智寺前

李敬初名鴻漸江都人洪武初以文學徵六年授刑部

尚書本年致仕十四年起為祭酒賜之勅謂所用非人

致災異疊見賢人避位故遣行人召之尋免歸

分省人物考

成繼興化人洪武中由代州學正薦知蔚州尋陞北平

布政使左叅議璫與守將協力修邊備民賴以安招邊

卒勇敢者得二千人以進上嘉之授吏部左侍郎以疾

歸尋卒官其子傑為行人

分省人物攷 興化縣志云子偉以廕授江西樂安縣廉

能為六十九縣第一 游陞淮北河道

王業字時泰興化人年十六襲父職官京師扈車駕北

征凱還官吉安梅花洞寇作僉議非業莫能平往未踰

月果平之永豐大盤山賊首曾子良聚眾劫殺業即奮

然以行日兵固不擅調然民患之急可坐視乎即日選

精兵二百餘人倍道以行或風其急業曰彼烏合之眾

耳急則計無所出若少緩則得以為備法固各有所用

也粹至逼其營壘一鼓而勝大盤平升本所正千戶數年浙寇起吉安軍當調業統以往常為先鋒大軍潰而業之軍獨全業輕財好義御士卒嚴而有恩駸駸乎大用而竟齋志以歿年四十九

分省人物攷

楊允字執中寶應人洪武十四年歲貢官御史年纔二十餘為人明斷善治獄帝甚寵任之時人呼小楊御史歷江西按察司副使前後斷獄凡四萬餘卒年三十二

雍正志

陳炎字公信江都人洪武間貢入太學授御史巡按雲南每出解見院東民家烟突出人手作招訴狀心知有冤粹召其家長督錮之而搜檢其家物得江西估客路

引一紙乃出訊之曰爾前者沒江西估客財而殺之匿其屍竈下今露矣其人即伏罪時詫其神歷陝西左布政使以忤藩邸歸

雍正志

陳晟字克昭寶應人洪武中以能書薦入中書累遷五軍都督府斷事有都督某犯法當死太祖念其有功欲釋之晟條列所犯入奏上怒命尚書茹瑞劾實及瑞復旨與晟初鞫無異上乃悅一日當奏獄上收其奏牘令晟背誦晟誦如流上曰見汝年少特試汝耳陞大理寺丞調湖廣按察僉事後使日本回有憾晟者發其用私

錢易馬謫居山東既而悟曰彼以已錢易物何罪召還
補通政司經歷遷吏部考功司主事後以老乞歸居鄉
足跡不涉城府課子孫力穡與編氓無異

雍正志

彭真字幼實儀真人洪武間舉人入太學永樂元年詔
遴國子生四人輔贊親王真被選靖江王府審理正王
甚重之居十八年授大興縣真莅官數月沈滯叢沓咸
見理釋會建宮殿擢工部營繕司郎中遷戶部頃之乞

歸

儀徵縣志

袁復字仲仁寶應人工書法洪武六年罷科舉專用辟
薦復於十三年被薦赴京授中書遷吏科給事中轉山
東按察司僉事山東當元季之後水旱蓄傷失業者眾
復至撫綏惠保民甚德之徵為大理寺丞陞右少卿永
樂元年吳浙大水成祖命戶部尙書夏原吉視水以復
副之浙西諸府蘇松居下流常湖嘉興三府水環以太
湖納杭湖宣歙諸山水注澱山諸湖入三泖是時浦港
湮塞滙流漲溢復建言宜浚吳松諸浦港泄壅淤以入
海又言嘉定劉家港卽古婁江徑通大海常熟白泖港
徑入大江吳松江南北兩岸安定等浦港引太湖諸水
入劉家白泖二港使直注海松江大黃浦旁有范家濱
至南倉浦口接大黃浦以達泖湖之水濬之便制曰可

於是吳浙水洩農田大利

朱克生人物攷

尹禮寶應人歲貢生洪武間官刑部主事侍從東宮初仁宗爲世子時孝恭有文德靖難師起世子居守漢王高煦從軍有功與世子有隙時危世子賴閣臣解縉諫儲位乃定永樂七年成祖巡行北京詔蹇義金忠黃淮楊士奇輔皇太子監國是時禮以主事侍從十二年成祖親征瓦剌還皆下獄當是時成祖居北京皇太子在畱都距隔數千里小人附漢府者陰爲間讒構百端及成祖崩皆復官贈禮吏部左侍郎洪熙元年加贈兵部尚書以譖愬前死故也無子

人物攷

楊廉字念清泰州人洪武中由明經舉爲御史宣德初擢貴州右叅議在黔六年清操一節賜璽書褒之及卒無資歸里遂卜葬城東三坡林因家焉

貴州通志

步從信字仲實揚州人洪武間知開化縣建縣治興學校招流亡民咸復業政平弊革陞肇慶府知府

浙江通志

顧謙字仲謙儀真人建文三年進士授行人尋拜御史按治南詔時兵伍之制未成謙至編立衛所尺籍伍符釐然不紊會吳橋賊猖獗謙奏誅之按部宣朝廷德意給以冠服使知向化賊有以金繡雜物餽者歸皆奏聞帝以京師流民輻輳恐無告失所爲設飯堂市中多備

藥物使謙主其事謙曲爲嫗煦全活甚眾上嘉之洪熙
初擢通政司叅議以同列連坐降本司知事宣德間以
薦遷江西按察僉事再調浙江以老病乞歸卒著有魯
齋愛梅軒遺芳諸稿

雍正志

黃惟正字用中儀真人永樂二年進士爲戶科給事中
遇事敢言舉劾無所避嘗兩論冢宰蹇義義銜之會晉
府長史缺上勅吏部推能幹正大官補之義疏惟正以
聞上欲留之他用義曰能幹正大無如此人遂命以往
至則王敬憚焉惟正性剛毅體幹魁梧美髭秀目時方
以公輔期之爲義中傷怏怏以卒

儀徵縣志

高穀字世用興化人永樂十三年進士選庶吉士授中
書仁宗卽位改春坊司直郎尋遷翰林侍講英宗卽位
開經筵楊士奇薦穀及苗衷馬愉曹鼐四人侍講讀正
統十年由侍講學士進工部右侍郎入內閣典機務景
泰初進尚書兼翰林院學士掌閣務英宗將還奉迎禮
薄千戶龔遂榮投書於穀具言禮宜從厚援唐肅宗迎
上皇故事穀袖之入朝示廷臣曰武夫尚知禮况儒臣
乎衆善其言因抗章懇請如遂榮言帝雖不從亦不之
罪二年進少保東閣大學士易儲加太子太傅給二俸
應天鳳陽災命祀三陵振貧民七年進謹身殿大學士

仍兼東閣內閣七人言論多齟齬穀清直持議正王文
由穀薦數擠穀穀屢請解機務不許都給事中林聰忤
權要論死穀力救得薄譴陳循及文構攷官劉儼黃諫
帝命禮部會穀覆閱試卷穀力言儼等無私且曰貴胄
與寒士競進已不可況不安義命欲因此構攷官乎帝
乃賜文子中式惟黜林挺一人事得已英宗復位循文
等皆誅竄穀謝病英宗謂穀長者語廷臣曰穀在內閣
議迎駕及南內事嘗左右朕其賜金帛襲衣給驛舟以
歸尋復賜救獎諭穀既去位杜門絕賓客有問景泰天
順間事輒不應天順四年正月卒年七十穀美丰儀樂
儉素位至台司敝廬瘠田而已成化初贈太保謚文義

明史一百六十九

董璘字德文高郵人少以才學名永樂十六年會試第
一殿試二甲第二授編修以母老乞歸養母嘗病思鱖
魚已過時璘禱於江神竟得二鱖以歸人以爲孝感母
喪終陞修撰與修宣宗實錄主浙江試分校會試後憤
太常典禮樂不可以畀異流乞自爲其官忤王振譴還
鄉里卒於家著有玉堂清餘集雍正志 明史劉球傳
璘疏上振遂指球同謀
並逮下獄屬指揮馬順殺球支解之瘞獄戶下璘從旁
竊血袞遺球家後其子鉞求得一臂裹袞以殮獄解遂
歸不復出見
一百六十二

高昭字文昱寶應人永樂十九年進士官貴州道御史
巡按雲南時藩府陰蓄異志昭變服爲日者詣府與王
語禍福甚驗王親愛之告以實昭微諷不利辭去未幾
按至其地王視之乃昭也大悔懼謀遂寢

寶應縣志

羊冕字文中儀真人宣德初應貢選高等授延安同知
清慎有聲以誤免歸角巾布袍意恒坦裕有白行中者
故延安諸生也常被冕恩至是轉運江淮特造冕第厚
致餽冕堅辭惟受蔬果後遇赦應得冠服嘆曰吾乃因
赦冠服耶卒却之士林服其狷潔

儀徵縣志

陳璉興化人正統初由鄉貢知江西興國縣清勤不懈
多惠政築長信里堰塘母喪去民走訴上僚挽留之得
請於朝服闋再任三載

江西通志

李岫字景瞻高郵人正統三年知江西永豐縣剛介嚴
明鋤擊豪右法無少貸勸富民出穀萬斛以備賑有不
便者以私誣之去邑民涕泣哀訴請留藩臬交章白其

事乃復職

永豐縣志

龔謙字廷益高郵人正統十三年進士授御史英宗北
狩謙首疏迎復建儲二事直聲震臺中巡鹽兩浙姦蠹
悉祛旋清軍湖廣得大體都御史寇深移文他省清軍
者令俱以謙爲法未幾卒於官人咸惜之孫勳以孝聞

雍正志

張曦字景芳江都人景泰間以例貢授湖南攸縣民素強梗曦躬行化導之門禁清肅戒絕餽納昭雪幽枉寬其徭稅不事苛暴民遂感服乞歸後民為立生祠祀之

雍正志

朱暄字景文高郵人景泰元年舉人薦授御史巡按山東不避權幸有宮掖乳媪季姓者占奪民田暄覈實奏按以法改按雲南曲靖府俗素獐悍奏為建學設官省有險道開山路百餘里行者便之立祠道左名朱公嶺外補巖州府九年刑清政簡罔罔常虛攷績為天下第一常植柳其地人呼曰朱公柳陞福建叅政未任而卒

雍正志

王讓字時遜泰州人由景泰三年舉人歷三縣尹皆有奇績復知四川洪雅縣縣初建城垣公廨俱草創讓隨方規辨與民同畚鍤間出已俸犒賞未期工竣民不告勞暇則循行阡陌田稅均平數年戶口增五千餘麥產五岐禾穎九穗瓜茄一蒂結十實以老辭歸邑人建遺愛樓塑生像以事之

雍正志

張冕字汝端江都人天順三年舉人同知台州府衙署清肅直謁無敢入攷滿增四品俸復任五年比歸家人

誤持官金入舟至中途始覺急返之遷激江知府操履益峻後家居淡薄運使畢亨分俸金遺之固辭不受

雍正志

邱俊字漢英江都人天順八年進士累官雲南按察僉事念母老無他子弟侍養會捧表進京卽上疏乞終養

詔許之稱孝搢紳間

雍正志

張文字存簡泰州人成化二年進士官刑部時奉命錄囚畿內多所平反有馬平兒者報父仇抵罪文上疏謂君父之仇必報反復累數百言讀者感動平兒遂得免

死陞浙江按察副使伸雪冤枉全活甚衆文平生自奉儉約周人之急則傾囊弗吝尤嗜學不倦所作詩文皆

有關世教云

雍正志

柳炎字邦用儀真人成化二年進士授戶部主事監收密雲軍儲請託不行監督淮安糧餉中官不得恣搆之左遷南陽通判改廣平稍遷吉安同知吉俗健訟炎擊奸右良能聲甚著江西民逋負歲弊藩臬命炎賫金赴浙織辦餘千金歸悉還之官時稱其廉擢知嘉興府修海塘繕城郭百務具舉初里胥侵盜官租歲爲民患炎廉得其人悉抵於法釋寃囚數百人卒於官士民爲置棺以斂解無餘資著有東津詩集

雍正志

馬岱字伯瞻江都人成化二年進士初任戶曹會計出入人莫敢欺知泉州府民有數世不葬其親者岱至諭以禮旬月葬以千計僧每以尼爲下院岱罪其尤者餘尼悉以配平民風化爲之一變內艱解任行李蕭然泉民戀不能舍性剛峭好面折人過不避權貴人多嚴憚之雍正志

冀綺字文華寶應人成化五年進士授戶部主事歷郎中會歲饑奉詔賑河間諸府稱旨爲威寧伯督餉條上邊務及時政二十餘事多見採納嘗劾皇親姚福等不法帝嗟異之曰好很郎中擢應天府丞遷太僕寺卿洪

武初設太僕寺於滁州八監十八羣江南民十戶養一馬江北戶養一馬馬皆牝歲課駒一三歲印烙悉至滁後更定五家養一馬駒不足罰鈔貫七百永樂都燕設太僕寺於順天凡兩淮及江南馬政南太僕主之又給牧地免其差徭自後計丁養馬成化時官收地租牧地盡歸豪右民甚累綺疏言自計丁養馬人戶逃亡槩派丁田出辦馬頭內所編羣長有貼戶銀獸醫有藥餌銀自官徵地租畝無隙地有草料銀馬性惡濕歲倒損十二三有賠馬銀孳息不時有補駒銀每季至滁有印烙例銀本寺備馬匹費不過三十兩赴南京兵部者每匹

五十兩赴北京倍之伏惟寬其稅而復其舊若積弊陋
規臣之職也臣能芟之又疏云揚州水鄉牧地少六合
天長等縣地廣草蕃乞均攤泰州高郵儀真江都寶應
五州縣馬匹報可揚人德之陞應天府尹尋致仕歸淮
揚旱蝗猶具疏以聞

人物
攷

高銓字宗選江都人成化五年進士始入仕或勸增年
就臺諫銓謝不可累官河南按察使風紀整肅歸德有
黃河退地千頃爲親藩所據上命中官與銓按實銓欲
還民中官怒脅以惡語執不變竟如銓議歷左布政使
巡撫保定有奸民獻民田爲皇莊者銓奉命勸實以聞
乃歸田於民又立九則均徭之法民皆帖服正德中爲
南京戶部尚書改衛士廩折米每月兼給著爲令以劉
瑾故致仕逮獄瑾誅復官銓性溫厚好禮推挽後進不
遺餘力家居雖鄉黨小吏來謁亦必公服送迎鄉人感

之

雍正
志

陳璧字瑞卿高郵人成化八年進士授浙江嘉興縣性
抗直不折節權貴擢江西道御史久之晉山東兵備副
使分守臨清臨清漕河所經夫役百需蠱弊甚璧裁省
一切冗濫有貴璫怙勢璧折以法進本司憲繩貪墨甚
嚴侵牟者黜弗貸升南京太僕寺卿會邊鄙不靖兩京

歲取備用馬萬匹南直隸止三分多折價寄養壁從容
處分安輯無擾升右副都御史整飭邊備尋以疾歸壁
性孝友事伯兄如父嘗以御史居家因微譴受撲無難

色人皆高其義云

分省人
物攷

朱訥字存仁寶應人徵君瓘子年十三父令坐肆治賈
一歲問市價金品皆不知父怒曰爾日何爲日讀書父
日能日記千言乃許歷試之果然遂聽之舉鄉薦就選
得浙江鄞縣縣居浙稱第一歲供應費逾萬金知府姜
昂自訂會籍削費十之七置府庭訥固請下籍于縣歲
終乃會又省三之一姜益欽服倭夷來朝利與中國市
守臣怪倭久留于鄞趨有司牽海舶行倭操短兵譟呼
出殺牽夫數人訥單騎入其曹語譯者以禍福約三日
出關仍治殺牽夫罪倭懼乃定增修錢湖七堰水不暴
田歲以豐稔鄞有巨室居要津擅作威福僮奴百人縱
恣刻害鄉里官多畏之訥縛其豪奴置之法巨室怒遂
擠訥改調湖廣長陽縣榮王就國用蜀舟萬艘有司亟
掠舟得百艘訥偵知風從東南來馳赴巴陵索之三日
得萬艘又檄入施夷壘解其積年仇殺巡撫都御史以
下皆奇其才又得前治鄞狀交薦之調江陵時鄞之巨
室已致仕江陵以丁夫車馬爲大費訥窮詰主者出匿

錢萬緡以母憂去遂不仕著有江陵集子應登另有傳

人物

張稷寶應人官御史奏言比來末流賤伎妄厠公卿屠狗販繒濫居清要文職有未識一丁武階亦未挾一矢白徒驟貴間歲頻遷或父子並坐一堂或兄弟分踞各署甚有軍匠逃匿易姓進身官吏犯贓隱罪希寵一日而數十人得官一署而數百人寄俸自古以來有如是之政令否也帝得疏意頗動居三日貶李孜省凌中等四人秩奪黃謙錢通等九人官人心快之

見明史一百八十一王瑞傳

雍正志云稷字世用成化八年進士授太常寺博士擢御史巡按福建大帥估勢為民患稷列其罪奏黜之嘗以傳奉冗員滯亂仕路率同官奏入云云稷每對客撫掌論時事氣勃勃不能平草陳時政疏數千言未及上而卒著有竹西稿

旨政字有恒泰州人成化十一年進士授南京戶部主事轉員外郎郎中出守武昌守正奉公多所興革陞山東叅政弛南旺湖禁以食貧民陞山西布政使以所餘餉銀千兩歸於代者晉右副都御史巡撫寧夏忤逆瑾逮輸邊瑾敗復職尋卒

分省人物攷

金琇江都人成化十三年舉人正德初知湖北保康縣廉介正直吏民不敢欺時歲祲兵擾民將竄去琇推誠安撫之民始樂業尤加意學校待士以禮文風漸興去

官後民立祠祀之

雍正志

葛萱字光庭高郵人成化十四年進士授行人擢御史建議除盜恤軍選將及借留起運軍儲十餘萬石賑濟鳳陽等處一時軍民感悅宏治初巡視山東滄州鹽課兼理河道奏減竈民賠償消耗鹽課一百四十七萬餘引改巡廣東征後山瀧水擒獲賊首姚觀祖等斬首二千餘後山賊爲廣東害數年萱一日平之上特勅獎諭陞江西僉事又改陝西督征哈密軍餉有功九年罷歸十年上追念前績遣賜白金文綺者再

雍正志

儲權字靜夫泰州人九歲能屬文母疾刲股療之卒不起家貧力營墓域且哭冢夜讀書不輟成化十九年鄉試明年會試皆第一授南京攷功主事孝宗嗣位疏薦前直諫貶謫者主事張吉王純中書舍人丁璣進士李文祥吉等皆錄用久之進郎中吏部尙書耿裕知其賢調北部攷注臧否一出至公嘗覈實一官裕欲改其評權正色曰公所執何異王介甫羣僚咸在側裕大慚徐曰郎中言是然非我莫能容也擢太僕少卿請命史官記注言動如古左右史時不能用進本寺卿武宗立塞上有警條禦邊五事又陳馬政病民者四事多議行正德二年改左僉都御史總督南京糧儲召爲戶部右侍

真修揚州府志 卷之四十一
郎尋轉左督倉場所至宿弊盡釐劉瑾用事數凌侮大臣獨敬嚙稱爲先生嚙憤其所爲五年春引疾求去詔許乘傳有司俟疾痊以聞其秋瑾敗以故官召辭不赴後起南京戶部左侍郎就改吏部卒官嚙體貌清羸若不勝衣淳行清修介然自守工詩文好推引知名士辟遠非類不惡而嚴進士顧璘嘗謁尙書邵寶寶語曰子立身當以柴墟爲法柴墟者嚙別號也嘉靖初賜諡文

懿

明史二百八十六

黃瓚字公獻儀真人成化二十年進士授南京戶部主事進員外郎督湖廣諸州餉父喪服闋遷本部郎中出爲四川布政司右叅議督松潘諸路邊儲時番人爲寇瓚至備示朝廷威德禍福順逆之勢諸洞帖然母喪歸服除起四川左叅議正德初藍鄂諸盜起巡撫林俊檄瓚分守保寧深入通巴解散賊黨遷浙江右叅政擢江西右布政使時寧濠不法諸司多爲所制瓚獨不撓轉湖廣左布政使吏部疏天下外官治行五人瓚第一賜宴禮部陞應天府尹巡撫山東時山東寇亂之後郡縣貪殘瓚乃身示儉樸藩臬以下無敢有燕樂者黃河決城武請遷縣安民劾舉庶官貪廉臧否不私裁臨清關中官溢稅設保伍法弭響馬盜修武備繕城郭百廢悉

整武宗嘉其勞遣中使齎金帶一品服賜之瓚以無功
辭入爲南京兵部右侍郎江彬扈從南巡值其生日部
寺俱賀瓚獨不往嘉靖初致仕卒賜祭葬著有雪洲文

集

雍正志

許堯江都人宏治中知直隸晉州臨政不怠嘗曰爲民
牧興一利不如除一害布教化決冤獄剷弊抑豪境內
肅然郡人稱之曰清慎勤以立已公明斷以治人當時
以爲的論畿輔通志

仲本字與立寶應人宏治二年進士授刑部主事謫汝

寧通判歷遷陝西按察使以事謫兩浙運同尋革職歸

嘉靖御極加按察使銜本爲人木彊執法無所迴避在

刑部時尙書何喬新剛介司屬少當其志獨器本大獄

多屬本裁決河南知府某憑藉奧援貪橫甚本發其奸

漢中盜起本提兵勦平之寧夏宗藩告變本倡義撲滅

旬日遂定其亂

寶應縣志

陳達字兼善揚州衛人授四川威遠縣入覲吏部舉天

下廉吏七人達預焉後以病歸民立去思碑頌之

雍正志

盧瀚字文淵江都人宏治六年進士授兗州府推官政

操敏肅累斷大案有異政郡人祠祀焉行取河南道御

史首論周經許進當從衆薦召用文森等因論事下獄

宜寬宥其邪佞如陳瑤李溫俱可斥免雜進如孫伯謙等亦乞罷遣又因災異力請開納讜言以祛敝政及除冗用省京儲凡所論列並切大體遷知岳州府以疾乞

歸尋卒

雍正志

陳玉字德卿高郵人宏治六年進士改庶吉士授御史時災異迭見玉疏經國大務數千言皆切利病上嘉納之歷北畿陝西浙江三省提學累陞僉都御史正德初進兵部侍郎提督東西兩路邊務東起山海關西止龍泉關延亘二千三百餘里大小關隘三百四十餘時邊防未固兵馬未足而朵顏等衛人勾引北敵乘隙竊發東路旣寡弱無援西路尤單薄不足恃玉乃條陳急務四事悉見施行在邊六年悉心籌策邊境肅清屢疏乞休不允復陞南京右都御史掌院事致仕玉敷歷中外幾三十年皆懋著聲績爲世名臣著有友石亭集四卷

奏議四卷

高郵州志

徐蕃字宣之泰州人宏治六年進士乞終養歸後謁選授南京吏科給事中以論劉瑾違杖幾死放爲民瑾誅起爲江西叅議擢浙江提學副使抑浮靡崇理學累仕爲都御史出撫鄖襄清覈流民得二十餘萬後以工部右侍郎提督易州廠以疾乞休蕃性簡淡寡嗜好居處

衣餼取給而已嘗見其子治室頗整肅之素無妾媵其妻在家爲購女備巾櫛蓄歸卽日遣還其家

雍正志

趙鶴字叔鳴江都瓜洲人宏治九年進士授戶部主事爲尙書侶鍾所知十五年天下大祲鶴代草上寬恤事宜詔文武大臣會議蠲諸不急著爲例陞郎中督永平山海薊州糧草兼視屯田條上邊場急務十六事又以征收草豆積久腐敗奏請折價貯庫臨時和糴以給軍需其古北口等倉儲不足以供遊兵請更番操練有警調發自是邊儲賴焉正德初陞建昌府益府軍校有恣橫虐民者捕置之法閩瑾以規賄不得搜薊州耗糧事

左遷南安同知尋擢金華府在郡疏請廣折徵寬加派備積貯禁溺女諸事錄東萊北山魯齋仁山白雲五先生遺書爲正學編集范香溪以下諸家爲金華文統集劉孝標駱賓王舒元興及近世四十餘人文爲文統拾遺表范文簡潘默存之里皆正俗誠民之要擢山東提學副使或以其約士過嚴爲蜚語謗之卽上疏乞歸築精舍嘗編維揚郡乘具區文集若干卷

萬曆志

徐昂字文舉江都人宏治九年進士授兵科給事中屢疏陳治道及論邊備皆切中時務正德初劉瑾引用其黨馬永成谷大用等八人戶部尙書韓文抗疏暴瑾罪

瑾矯旨罷文官昂疏言文端謹素著國家倚以為重不宜罷瑾矯旨并奪昂官嘉靖初郵錄舊臣起昂為廣東右叅議昂初無子就王生相生日君今年登第但不宜子後在西安途中買一妾詢之乃良家子即焚券為擇配秩滿如京師相者迎謂曰君相頓異可得子矣後數歲果育五子雍正志

左唐字堯卿江都人宏治九年進士為廣東叅政署司篆吏無所容奸恨欲撓之會查盤使者至所盤計鉅萬獨羨餘百金訝其少詰守藏者曰事由署印叅政使者弗審徑以論唐唐忿而病僚友慰之拊膺曰平生砥礪

名節顧乃蒙垢若此遂不食而死同寅並潘臬曾呈

按言唐寃按為覆盤庫則應有羨餘故在實不止百金將奏雪之以唐喪歸乃止唐性廉介以官為家不問生產喪歸囊橐蕭然倫以訓為誌墓且書其寃雍正志

胡獻字時臣興化人宏治九年進士改庶吉士授御史踰月即極論時政數事言屠瀟為吏部尙書王越李蕙為都御史皆交通李廣得廣得售奸由陛下議政不任大臣也祖宗時恒御內閣商決章奏經筵日講悉陳時政得失不時接見儒臣願陛下追復舊制京通二倉總督監督內臣每收米萬石勒白金十兩以歲運四百萬

石計之人四千兩又各占斗級二三百人使納月錢夫
監督倉儲自有戶部焉用中官願賜罷遣京操軍士自
數千里至而總兵坐營等官又各分屬辦納月錢乞嚴
革以蘇其困陛下遇災修省去春求言諫官及郎中王
雲鳳主事胡燿皆有論奏而雲鳳尋得罪則與不修省
何異願斷自聖心凡利弊當與革者即見施行東廠校
尉本以緝奸邇者但為內戚中官洩憤報怨如御史武
衢忤壽寧侯張鶴齡及太監楊鵬主事毛廣忤太監韋
泰皆為校尉所發推求細事誣以罪名臣亦知今日言
之異日必為所陷然臣弗懼也疏入鶴齡與泰各疏辨
會給事中胡易劾監庫中官賀彬貪黷彬亦計易帝遂

下獻易詔獄謫獻藍山丞未赴遷宜陽縣又遷南京都

察院經歷武宗即位擢廣西提學僉事遷福建提學副

使未任卒

明史一百八十一嘉靖志云獻方直好古廷
對策語指陳時事謂政權歸於內使大臣奉
行文書呼家奴為老先生等語尚書馬文升讀卷為之
嘆服後卒於官無以為斂同寅助之護其喪及妻子以
歸稿葬三十餘年貧不能襄事嘉
靖間侍御胡植檄有司為營塚壙

王軌開平衛人宏治十二年進士正德初歷工部員外

郎屢遷山東左布政嘉靖初入為順天府尹房山地震

輒言召災有由語多指斥忤旨切責尋遷右副都御史

巡撫四川芒部土官知府隴慰死庶子政與嫡子壽爭

立朝議立壽政倚烏撒數構兵使人誘殺壽奪其印軌乃會貴州兵擒政於水西招降四十九寨璽書獎勞時將營仁壽宮就拜軌工部侍郎督採大木工罷召還改戶部覈九門首藉地以餘地歸之民勘御馬監草場釐地二萬餘頃募民以佃房山民以牧馬地獻中官韋恒軌釐歸之官奸人馮賢等復獻中官李秀秀爲請於帝軌抗疏劾之竟治賢等如律覈勦戚莊田請如周制計品秩別親疏以定多寡非詔賜而隱占者俱斷戶部尙書梁材採其言兼并者悉歸官稍進左侍郎初軌之平隴政也以隴氏無後請改設流官兵部尙書李敏等

之遂改芒部爲鎮雄府分置四長官司授隴氏隸屬阿

濟等爲長官而擢重慶通判程洸爲試知府隴氏舊部沙保等攻執洸奪其印欲復立隴氏後巡撫王廷相等破保洸得還保子普奴復連烏撒水西苗攻剽畢節諸衛帝命伍文定圖之以朝議不合召還御史戴金因言芒部改流之議諸司咸執不可軌徇洸邪說違衆獨行致疆場不靖遂罷軌官以兵部尙書李承勛薦起故官總督倉場再遷南京戶部尙書御史龔湜劾軌老悖吏部言軌居官儉素摺紳儀表帝乃責湜妄言久之就改兵部參贊機務詔舉將材薦鄭卿沈希儀等二十一人

皆擢用居四年以老乞罷疏中言享年若干帝以為非

告君體勒為民久之卒

明史二百一 萬厯志云軌初授戶部主監崇文門稅司禮太

監蕭敬家奴市猪隱稅軌執而訊之忽健卒數十擁奪去敬以告尚書侶鍾鍾笑曰乳犢寧知畏虎耶陞員外郎奉命視直隸閩浙倉庫時劉瑾怙權每使還必以賄見軌獨不往瑾怒令科道覆覈卒無所加罪改工部員外郎郎監遵化鐵冶瑾黨致書為新炭戶請託且恐以危言軌不顧將具疏劾之會瑾敗乃已為順天府尹時內官有迎進大祀神牲需求無所得令所經道路築隄費不貲軌奏其生事害民狀權璫彈焉軌性至孝為諸生時父病思食柿不得遂終身不食柿

朱應登字升之寶應人宏治十二年進士明初制義取

士風雅多置不習至是則何景明李夢陽崛起北方江

南文士相應和者顧璘徐貞卿及應登三人而夢陽尤

推許應登時劉健當國謂翰林者他日執政也不宜崇

尚詞華抑文學士不得入翰林應登遂授南京戶部主

事然應登雖文人精於吏事知延平府多善政楊一清

為吏部尚書擢陝西提學副使初一清居是官建正學

書院應登拔秦士高等者聚其中出所藏書教之多所

成就以例調雲南尋陞叅政先是開封知府顧璘忤鎮

守廖太監為廖所誣奏逮入京應登疏言臣入關過大

梁詢顧璘治開封狀如某某事雖昔所稱龍圖不是過

也臣謂璘當首蒙擢用為理人者勸而後來者傳曰璘

逮矣璘逮奚罪願聖明一察臣言如臣言妄甘與璘同

罪會璘事已白遂不上莅滇年餘遭僚友見妬尋謝政歸研精經史推訂律厯以窮究其所學年五十卒著有凌谿先生集

人物攷

范韶字時美寶應人宏治十四年舉人授禮部司務遷戶部員外郎郎中擢浙江叅議韶性修潔每載米之官以廉見稱初高寶俱受湖患高郵以刑部侍郎白昂開康濟河民便之寶應越河獨未築汜光白馬諸湖滙為一週遭五百餘里恃一線隄障潰決最易韶為戶部員外郎時疏請開康濟河為寶邑數百年利邑人張拱疾亟四子皆弱齡拱以托韶韶撫如已子四十年無間顧

尚書璘作恤孤記以表其德拱字文著宏治九年進士

授江西德興縣為人醇謹早卒

寶應縣志

葉相字良臣江都人宏治十五年進士官金華同知平獄均賦郡民戴之入為給事中時劉瑾擅政中外無敢言相首疏劾瑾又上建儲及漕運庫藏等十餘疏皆剴切識治體因忤權貴出叅政貴州歷江西布政使已復擢貴州巡撫會芒部構亂相討平之賜鏹幣擢戶部侍郎尋以病予告久之起補刑部侍郎三年不調或諷以賂主爵者相笑曰有納粟尚書耶尋告歸築迂隱園以老卒賜祭葬祀鄉賢

萬厯志

朱嘉會字亨之寶應人宏治十五年進士年二十三觀
政都察院晨夕讀律疑輒就人講貫授東昌推官諸
大吏少之試以難決獄嘉會援筆立判悉得其情有李
氏女訟亡夫有金藏父所無左驗官久不決嘉會曰無
富女誣貧父事父慚出半還之有童婦亡去者其父訟
舅箠死匿之嘉會鞫他尼僧乃得其婦人以爲神擢兵
部主事進員外郎改御史授廣信府時有巨盜眾數千
人擅號攻城邑劫府庫嘉會至罷一切文法使民富者
出粟貧者任城守習戰鬪又募土兵出不意擣其虛賊
稍稍引去明年賊更出境寇衢州朝遣大軍撲勦嘉會
主辦芻糧濟軍亂定民以不擾歲飢上請蠲田租發布
賑貸除民所不便十餘事民德之擢辰沅兵備副使尋

卒祀名宦

寶應縣志

楊果字實夫興化人宏治十五年進士由戶部主事陞
刑部員外郎吏部文選司郎中黜陟明允請託不行陞
南京右通政攝刑部事凡三大讞無寃聞寧王宸濠變
上言九事尋乞養歸嘉靖初用言官薦起南京太僕寺
卿陳馬政便宜數事從之陞太常寺卿再乞歸養復起
爲南京戶部侍郎攝部事卒於官果天性孝友執親喪
三年號泣不輟歷官南北以母老不挈妻子所受業師

四喪皆為舉之且恤其孤官清要自處恬退嘗謂人曰
吾平生無所長唯不識劉瑾錢寧江彬三人差自慰耳

雍正志

王儼字士望江都人宏治十八年進士知福建光澤縣
以廉謹稱擢南京刑部主事人不可干以私有權要于
殺人論之如法陞郎中執操愈嚴出守岳州以直道不

容歸雍正志

盛儀字德璋江都人宏治十八年進士觀政吏部時劉
瑾以事干尚書托儀致書儀拒不許以是知名授禮部

主事改御史時文體日靡儀請崇廉恪之學以挽士習

陞山東按察副使勦商河巨盜寬夫役之困東人戴之

遷雲南叅政察屯務釐宿蠹尋陞湖廣按察使督修顯
陵多所節省又活飢民萬計入為太僕寺卿立解馬法
著為令儀居官以清峻著致仕歸橐無餘貲性孝友兄
弟終身同居卒祀鄉賢著有惟揚志二十卷雍正志

陳言字汝行江都人正德二年舉人授直隸棗強縣治
稱廉明有權璫欲造橋衡水令棗強助費巨萬言執不
可罷其役邑旱跣禱雷雨大作歲大稔攷滿遷處州通
判棗強士民遮道泣留建祠以祀雍正志

景暘字伯時儀真人正德三年進士廷試第二授編修

劉瑾方橫凌轢儒臣薦紳喪氣見暘獨嚴憚暘亦不少
降在經筵必先夕齋沐遷國子司業以母老乞南改中
允南京國子司業禁諸生請託不悛者繩以法性孝友
姊早寡迎與母俱視其子女無異已子友人張貢約爲
婚姻未幾貢死暘曰聘雖未行已心許之矣召其子妻
之暘又有女以瞽廢其友潘準聞之曰不可使伯時女
不字願字吾子人兩義之換有前溪集若干卷

雍正志

王大用字時行儀真人正德二年進士授工部主事管
臨清閘時流賊剽掠趨清源大用與兵備道督壯勇與
戰賊解去轉刑部員外郎擢廣東兵備僉事會樂昌高

快馬流劫湖南召大用合兵討獲有功又清遠徭賊

所部渡滙江旗坑諸寨獲其酋又攻黃籐峽黃花洞諸
巢獲賊都督凡督征五載巡撫蕭翀疏其才陞本省兵
備副使尋陞江西叅政遷廣東右布政未幾推都御史
巡撫順天又改巡撫大同至則破巨盜劉善斬之傳首
京師初與按臣張祿爭禮不合祿嗾給事秦鰲論之大
用上疏乞休不允仍以整飭薊州兵備兼巡撫順天值
歲大飢奏給銀米數萬循行賑濟時朶顏三衛詐貢大
用單騎入城調兵扼險伏所部爲左右翼特之朶顏謀
洩宵遁復論其酋長令獻黑谷關地暨太平塞五百餘

里與飲盟去陞右都御史入掌院事張祿復論大用生
 事構怨坐免後以霍韜薦復命巡撫四川陞南京刑部
 右侍郎候代間會白草番變攻破平番堡坐還籍候勘
 乃致仕卒著有書經指畧四書道一編易經安玩錄及
 聖學一貫圖說雍正志

俞敦字崇禮江都人正德六年進士改庶吉士授刑科
 給事中敦在諫垣首劾遼蜀撫臣及諸藩守臣不職者
 時江彬潛圖不軌朝臣無敢言敦獨疏陳其逆狀不報
 十三年命勘河南總兵張璽等不法事敦執法按罪踰
 月獄成上特賜銀牌旌之一時權倖如錢寧輩彈敦名
 求與納交皆峻拒之遷禮科右給事中世宗卽位敦首

疏四事曰去壅蔽親儒臣立紀綱惜名器上嘉納後奉
 詔使安南賜麒麟服進都給事中出知梧州府卒雍正志

徐晉字文明江都人正德六年進士歷任南京兵部車
 駕郎中大璫劉瑾怙勢晉繩之以法宸濠叛南都震恐
 大司馬喬宇參贊機務知晉才悉以軍事委之晉選將
 調士修備器械增置船艘晝夜不怠及武宗駐蹕南都
 供億旁午晉從容取辦有言宜賄江彬者不聽人爲晉
 危而卒無患陞青州府以勞致疾易箒時同官憫其貧
 請入公堂羨緩若干營後事晉謝曰吾恨不能如前輩

馬伯瞻清風高節敢至死變其守乎拒不受雍正志

王紀字理卿泰州人正德六年進士授江西進賢縣時

洞蠻姚源古殺掠為害紀身抵其穴討平之在邑三年

滯獄苛征革除殆盡進南京工科給事中首疏建皇儲

謹大祀及邊防時務疏凡十餘上宸濠之叛畢太監謀

內應紀與大司馬喬宇策縛之武宗南巡紀屢疏請還

後為言者所中謫浙江嘉興縣丞陞山東武城縣會滹

沱河決捍治有功擢高唐州以憂去起補河間未幾擢

陝西僉事以賑飢積勞卒於官廟祀高唐雍正志 進賢縣志云紀

知進賢時建鍾陵書院祀周濂溪置院租並歸守者學使李夢陽為之記

儲洵字平甫泰州人正德六年進士官兵部郎中左遷

沔陽守歲飢積逋賦所司督責洵下令悉停止民賴以

安郡多水患請修隄防言甚剴切遷台州同知陞漳南

僉事漳舊多盜洵設條約督捕撲滅幾盡致仕歸博采

建文諸臣編輯革除錄及卒門人私謚文貞子雍正志

何棠揚州人正德六年進士歷官郎中以諫武宗南巡

受廷杖尋陞廣平府奏改官租驛馬種馬民便之郡有

大豪為害棠擒治不少縱又奏免廣平供賦之半後卒

於家廣平民來弔者數百人歷代鄉賢攷

黃堂字居正高郵人正德中由監生授江西新建縣丞

當路以其能薦知東鄉兵燹之後創設縣治城池署宇百爾具修勤於調度逆藩構亂遣內豎勾引東鄉餘孽堂以計誘致其渠戮之地方克靖用巡按薦進秩寧州仍治東鄉凡九年

江西通志

蔣山卿字子雲儀真人正德九年進士授工部主事以諫南巡被杖謫南京前府都事嘉靖改元復官陞刑部郎中出知河南府改潯州再改南寧時討思田土官岑猛山卿調度軍餉以功進廣西叅政總督林富重其才方擬薦擢坐讒言罷在南寧入覲上言思龍立縣不宜割屬田州導使攜貳移思恩而建府治於荒田尤為失

策又言兩廣總兵率用侯伯彼皆總轄子弟營求出鎮

股削無厭宜選謀勇將臣充其任又言廣西夷多民少右江如柳慶諸州縣左江如桂林平樂諸州縣皆城池圯塞千里荒涼猺賊得以出沒其間宜行撫按閱視修築城池繕道途置傳舍為一勞永逸之計其經畧大槩如此既罷歸以詩酒藝文自適著有南冷休園等集

雍正

樓觀字國光江都人正德十二年進士授刑部主事陞員外郎郎中出守興化政尚寬惠然吏無敢為奸仙遊苦海寇觀鑿石築城民賴以安每行縣自庀廚傳不擾

下邑陞湖廣副使致仕橐中惟圖書數卷觀之先出嗣
葉氏至子懋中嘉靖四十一年進士官刑部始疏復樓

姓雍正志

高濬字升之銓從子正德十六年進士授寧波府推官
攝郡事會日本貢使構亂濬討平之陞戶部員外郎督
糧通州值邊警歲漕四百萬石無缺陞郎中尋知順德
府時車駕幸承天道出順德濬抵任甫及旬供帳立辦
城沙河工竣陞河南按察司副使會河決睢州野雞岡
奉勅治之濬為鑿孫繼口塞河二百二十五里以疏橫
流復扈運口九十里上遣兵部侍郎王以旂視其役薦

濬勞績第一明年益發民濬三河未深者漕運賴之

增俸一級百姓肖像祀焉著有南苑州集順德府志雍正志

李樹敏江都人以選貢授浙江嘉善丞修築海隄著有
勞績再補安福丞時值均田敏自治食具出入阡陌不
以煩民除夕有饋豚蹄者家人受之業就鼎令挈還之
其清介類此卒於官士民皆垂涕祀名宦雍正志

李應暘字子新江都人為諸生工古文辭名噪輦下公
卿貴人爭致之應暘以親老托疾歸後以歲薦授臨邑
訓導再遷懷慶教授時興國吳國倫為參藩特器重之

陞南雄推官權梅嶺滄洗兩稅歲課巨萬不私一錢兩臺及郡守共嘆羨焉以疾乞致仕卒

雍正志

王大化字元成正德十六年進士授高唐州州人競武大化至則首謁文廟修學宮與諸生講藝暇則問風俗省賦斂勸農桑察冤獄招集逋亡鋤剔強暴州用大治擢嘉興府同知去之日萬民遮道泣建祠以祀擢工部員外郎奉勅分理漕渠遷刑部郎中決獄執法不徇請託忌者中之遂外補平定州致仕歸以疾卒著有高唐志北湄詩集續史詳節數十卷

雍正志

徐嵩字小石泰州人蕃子正德十六年進士授戶部主事與議興獻大禮忤旨受廷杖尋復職陞郎中出為河

間保定知府擢湖廣副使分巡江防時牛首山礦徒猖獗辰衡兩府騷然撫按屬嵩調官兵一鼓殲除反側者悉平捷聞遷山西參政晉方伯移撫順天朶顏三衛謀內侵嵩委身經畧賴以寧謐

泰州志

王暄字升之興化人嘉靖元年舉人判撫州攝府篆一年羨金秋毫無取知武岡不挈妻子岷王賜二姬不受平劭陽妖賊李承賢有功賜金幣疾篤同僚有以帑餘諷其自便者暄即日強起悉封識之遂卒岷王賻歸其

櫬祀名宦

興化縣志

重刊揚州府志 卷之四十七
宋應圖字義龍高郵人嘉靖四年舉人授山東招遠縣
清介自守無滯牘無冤獄退則侍母前甘脆承歡他不
計也五年報績馳封應圖曰吾榮親之願足矣卽掛冠

歸雍正志

陳常道字子中興化人嘉靖五年進士授四川富順縣
行取南京戶部主事轉員外郎郎中出知常德府陞四
川兵備副使爲政清儉慈惠有去思碑祀名宦興化縣志

方岑字高伯江都人嘉靖五年進士授大理寺評事陞
南京左寺正出知杭州府先是海寧縣令某於巡按御
史爲肺腑親引用巨猾六七人恣營奸利聞民怨乃逮
六七人者下獄夜使人殺之以滅口事發憲臣下岑按

驗得實庭笞逐之岑亦竟爲御史陰中罷免岑爲文宏
博出入左氏韓非劉向諸家詩宗初唐著有竹素齋集

雍正志

蔣應奎字文煥先世江都人以永樂初戍大同遂家大
同嘉靖五年進士授工部主事分司呂梁陞郎中改營
繕司董九廟慈慶慈寧諸大工告成賜銀幣陞大僕少
卿久之陞應天府尹鎮田萬畝荒弗治稅悉徵之里人
應奎親往勘爲出金築堤召民開墾成腴田以免困累
陞右副都御史巡撫遼東請發內帑築邊牆二百餘里

僅四月工竣省費萬計陞兵部右侍郎協理京營戎政致仕歸江都行李蕭然性嗜學手不釋卷語天下事歷歷如指掌清修鯁介其天性也

雍正志

曾銑字子重江都人嘉靖八年進士初知長樂縣擢御史巡按遼東遼陽兵辱撫臣呂經爲亂銑急檄副總兵罷經苛急事爲亂軍乞赦而捕獲首惡數十人請急誅斬懸首諸城全遼大定擢大理寺丞遷左僉都御史巡撫山東俺答數入內地銑請築臨清外城工畢進副都御史居三年改撫山西經歲寇不犯邊進兵部侍郎二十五年夏總督陝西三邊軍務寇十萬餘騎由寧塞營入大掠延安慶陽銑遣參將李珍捕寇定襄斬首百餘級寇大懼遁去時套寇牧近塞居民不敢樵採銑率諸軍驅之遠徙詔增銑俸賜銀幣有加銑念寇居河套久爲中國患上疏請以銳卒六萬鎗手二千每歲春夏之交攜五十日餉水陸交進直搗其巢爲一勞永逸之策條八議以進是時銑欲西自定邊營東至黃甫川一千五百里築邊牆請帑金數十萬期三年畢功詔曰銑倡恢復議甚壯其令銑與諸鎮臣悉心上方畧予修邊費二十萬銑乃益銳合諸臣條上方畧十八事已又獻營陣八圖并優旨下廷議廷臣見上意向銑一如銑言帝

忽出手詔諭曰今逐套賊師果有名否兵食果有餘成
 功可必否一銑何足言如生民荼毒何初銑建議時輔
 臣夏言欲倚以成大功主之甚力嚴嵩與言有隙欲借
 事傾言乃極言套不可復讖言以激帝怒旋復顯攻言
 謂向擬旨褒銑臣皆不與聞兵部尚書王以旂會廷臣
 覆奏遂盡反前說言套不可復帝乃遣官逮銑無意殺
 之也會咸寧侯仇鸞鎮甘肅以阻撓為銑所劾逮問嵩
 故雅親鸞乃代鸞獄中草疏誣銑掩敗不奏剋軍餉鉅
 萬遣子淳屬所親賂當途其言絕無左驗而帝深入其
 說竟擬斬即日行刑銑既沒家無餘貲隆慶初給事中

章自修御史王好問誌銑志在立功身罹重辟與不

識痛悼至今詔贈兵部尚書諡襄愍賜祭葬廕子汴判

應天孫之省判湖州府

明史二百四 又夏言傳江都人蘇綱者言繼妻父也雅與銑善銑方請復河套綱亟稱于言言倚銑可辦密疏薦之具一百九十六

徐子麟字瑞卿其先自甘州徙江都子麟以太學高等

補貴州都司經歷移雲南委理五井鹽課為前官補負

課千餘緡前官卒又倒橐助其喪還陞澂江通判晉烏

撒同知會苗兵亂諭以大義諸苗帖服無何被讒論罷

竟以貧死

雍正志

姚繼岩揚州人歷擢吏部員外郎以清簡見稱武宗南

巡倡部院諸臣連章奏留俱廷杖死者數十人繼岩幸
不死後陞太常寺卿卒無以葬有司念其貧爲經紀其
事

歷代鄉賢攷

林春字子仁泰州人父早卒春獨與母居晝織履治生
夜讀書常以竹筍注膏繫衣帶間惟所適則出膏於筍
燈讀不寐聞王文成良知之說心喜之日以朱墨筆點
記其意向臧否以自攷鏡久之復自悟曰此治病于標
者也駸駸乎有意於反本矣嘉靖十一年會試第一授
戶部主事調禮部又遷吏部文選主事吏部故矜厓岸
鎖門謝客雖親故人不在拜示自尊重春門無留賓偏
走刺答拜其尤厚者則相與挾衾被櫛具往宿觀寺中
講學竟夕以爲常是時搢紳之士以講學會京師者數
十人其聰明解悟能發揮師說者則推山陰王汝中其
志行篤實則推春與吉水羅達夫而春猶面疵其露才
其自斂飭可知已歸養母病寓故讀書處講學以其間
走山陰就王汝中叩所疑義每往必喜幸以爲聞所未
聞久之赴補稽勲調文選郎中州守黷而虐春言於尚
書黜之赴都時泊舟淮干淮守供帳甚薄後入覲注下
攷春獨言其廉留之居無何病卒年四十四著有東城

文集

分省人物攷

桑喬字子木江都人嘉靖十一年進士由主事改御史出按山西所部頻寇躡喬奏請盡蠲徭賦厚恤死者家參將葉宗等將萬人陷賊伏中大潰賊遂深入天城陽和兩月間五遭寇巡撫樊繼祖總兵官魯岡以下皆為喬劾副將李懋及宗等六人並逮治十六年夏雷震謹身殿下詔求言喬偕同官陳三事畧言營造兩宮山陵多侵冒古囊恣橫邊備積弛末言陛下遇災而懼下詔修省修省不外人事人事無過擇官尙書嚴嵩及林廷檝張瓚張雲皆上負國恩下乖輿望災變之來山彼所致疏奏四人皆乞罷詔廷檝雲致仕留嵩瓚如故嵩再疏辯且誡言者給事中胡汝霖言大臣被論引罪求退而已嵩負穢行召物議逞辭奏辯陰擠言官無大臣體

帝下詔飭嵩如汝霖指時嵩拜尙書甫半歲方養交遊揚聲譽舉朝未知其奸喬獨首發之喬巡按畿輔引疾都御史王廷相以規避劾之嵩因構其罪逮下詔獄廷杖戍九江居戍所二十六年卒隆慶初贈卹如制明史二百一十萬麻志云喬戍九江念母老治廬迎養母後歸江都喬獨居一室惟一僕供掃除汲爨而已生平嗜易占得其微奧所著有廬山記真詮詩文若干卷

張旦字子明寶應人嘉靖十四年進士授中書擢戶部員外郎遷郎中督餉大同會邊兵以餉匱鼓噪將為變

且為疏請詔戶部給一月糧更額外加芻豆軍士帖然歸伍帝嘉其能賜白金綵綺故事去任時支銀千兩號無礙銀且獨不受數轉至四川參政以憂歸且為人淡泊自守不肯干進嚴嵩柄政且為其所取士不與通以致閱三十年不得致華要且遠走瘴癘之鄉家居淳謹偕所善集湖村栩栩自得不一涉外事既卒子孫貧甚

雍正志

沈良才字德夫泰州人嘉靖十四年進士改庶吉士授兵科給事中尋轉工科左給事中時盧綱孫存互訐奏良才勘問伸存而抑綱一切株連皆得釋綱卒正典刑

陞吏科給事中嚴嵩甫入閣良才疏列其奸不報

京大理寺右丞尋進左少卿以僉都御史巡撫湖廣陞兵部右侍郎倭寇南訌議遣大臣討之嵩憾其嘗議已奏遣良才毅然請往會已命有人不果行尋自陳嵩誣以他事罷免初良才為諸生時富民劉欽請賑諸生之賢者良才獨却之御史李東嘉其節為備禮冠婚即以是年舉於鄉

雍正志

徐大經字正夫興化人嘉靖十六年舉人授直隸獲鹿縣歲大祲不待申報發儲賑飢者擢通判先是世宗朝郡縣獻芝稱瑞者萬計大經獨不獻徙河南太康減里

甲顧役錢歲省萬餘金有巨猾為害官軍莫敢訶大經徐伺其便以尺組繫之置諸法遷歸州太守嘗徵夷兵數萬人入境指揮嚴肅無敢譁者解組歸年八十四卒

興化縣志

曹守貞字子一江都人嘉靖十七年進士知浙江遂昌縣邑苦採礦役守貞條上其害遂得免十九年入覲同官傾之左遷晉州判攝趙州移知曲周縣嘗有惠政陞工部營繕司主事權荊州關稅時遼庶人恣暴於荆守貞不為撓遷員外郎陞尚寶寺丞典司者嚴世蕃與議多不合謫山東轉運判久之擢南京戶部郎中有頃京

營訛言欲裁粟布軍士大闕尚書患之問守貞守貞移

牒諸將士擇時日覈軍稽詐冒給糧布諸軍士相顧愕

曰何傳之謬耶事遂寢出為平樂府錄囚多從未減尋

乞休歸閉戶讀書不預外事著有畸侔軒稿

雍正志

袁孟龍字子雲興化人嘉靖十九年舉人知山東濱州時倉廩空虛令願入穀者償以金久之積數千石用賑貧民土城圯復以節省餘財成之著士鑑錄訓濱土其年鄉薦三人前此未有也好義重施撫孤贍貧時稱為

義君

興化縣志

張習字子翀寶應人嘉靖二十年進士授戶部主事陞

郎中督餉宣化府塞占窩之途裁後時之券嚴互察之法公召報之輸一時邊餉頓充會領軍把總某有罪不肯阿縱遂中蜚語謫知山西解州習曰親民令我素志也今獲遂矣到解卽詢瘡痍平徭役案無滯牒未一年卒於官先是習督宣化府餉時弟且亦督餉大同兩鎮相望號北門雙鑰云

寶應縣志

崔縶字淳甫江都人嘉靖二十二年舉人授直隸清苑教諭陞靈壽縣邑小民悍令多不滿任或調或罷去縶凡再攷最民甚德之擢倅山東萊州府乞歸故廬庠陋茹蔬飯糲儻然自適卒年八十七尙書劉光濟志其墓

志

朱曰藩字子价寶應人應登子幼博學工詩父執李夢陽顧璘見之稱賞不已中嘉靖二十三年進士知浙江烏程縣宿蠹積害爬梳靡遺大司空劉麟免歸結社峴山曰藩從之游幅巾嘯咏人不知其爲邑宰也歷南京刑兵二部主事轉禮部主客郎中留都事簡閉戶讀書詞翰傾海內居三年出知九江府新濂溪書院以館諸生二百餘人及景王之國曰藩病懣猶從臥榻上調度曰藩少喜讀道書手錄參同契長復讀浮屠氏經楞嚴法華諸書俱有注及年四十大悟前非與羅文恭洪先

講修身立命之學六經之書重經手錄各為纂注深得先儒不傳之秘先是為諸生時夢至一室中有獨領春風一座先之句後詣白鹿洞書院兩廡所懸即前所夢之句尋卒同郡桑喬經紀其喪乃得返櫬

人物攷

王思賢字霖佐先世由陝西長安遷揚州復遷寶應思賢由舉人授高州府推官高接壤嶺海浮食流民相聚剽劫思賢廉其狀盡除之嘗慮囚有一人坐大辟三十年察其寃立白大吏平反之攝化州盜靖訟息葺孔子廟疏理僨造之役民費大省而故額充足歲大飢捐俸賑粥勸富人輸助又攝茂名縣德政如攝化提學副使

某証以現任官立碑左遷廣西按察司知事高州人大

譁空府縣奔大吏保留弗得瀕行眾相聚閉城門會有上官夜出思賢易衣雜之出平明民覺遮道號泣思賢亦泣赴廣西任未幾卒子二言綸言綍俱縣學生崇禎末流寇起陝西言綸嘗畫策曰平賊之道曰設疑曰散黨曰用間戰攻不與焉惜舉世無人知者

人物攷

楊守誠字惟一江都人嘉靖二十五年舉人授直隸南樂縣遷河間府判再遷益府審理致仕歸與副使何城力請於太守吳桂芳築揚州新城並瓜洲城以禦倭寇著有防秋紀行稿屯鹽總議諸書

雍正志

李春芳字子實興化人嘉靖二十六年舉進士第一除
修撰簡入西苑撰青詞大被帝眷與侍讀嚴訥超擢翰
林學士尋遷太常少卿拜禮部右侍郎俱兼學士直西
苑如故佐理部事進左侍郎轉吏部代訥爲禮部尙書
時宗室蕃衍歲祿苦不繼春芳攷故事爲書上之諸吉
凶大禮及歲時給賜皆嚴爲之制帝嘉之賜名宗藩條
例尋加太子太保四十四年命兼武英殿大學士與訥
並參機務世宗眷侍直諸臣厚凡遷除皆出特旨春芳
自學士至柄政凡六遷未嘗一由廷推春芳恭慎不以
勢凌人居政府持論平不事操切時人比之李時其才
力不及也而廉潔過之時徐階爲首輔得君甚春芳每
事必推階階亦雅重之隆慶元年春有詔修翔鳳樓春
芳曰上新卽位而遽興土木可乎事遂止齊康之劾徐
階也語侵春芳春芳疏辨求去帝慰留之及代階爲首
輔益務以安靜稱帝意時同列者陳以勤張居正以勤
端謹而居正恃才凌物視春芳蔑如也始階以人言罷
春芳歎曰徐公尙爾我安能久容旦夕乞身耳居正遽
曰如此庶保令名春芳愕然三疏乞休帝不允旣而趙
貞吉入代以勤剛而負氣及高拱再入直凌春芳出其
上春芳不能與爭謹自飭而已俺答款塞求封春芳偕

拱居正卽帝前決之會貞吉爲拱逐拱益張修階故怨
春芳嘗從容爲階解拱益不悅時春芳已累加少師兼
太子太師進吏部尙書改中極殿度拱輩終不容已兩
疏請歸養不允南京給事中王禎希拱意疏詆之春芳
求去益力賜敕乘傳遣官護行有司給夫廩如故事閱
一歲拱復爲居正所擠幾不免而春芳歸父母尙無恙
晨夕置酒食爲樂鄉里豔之父母歿數年乃卒年七十
五贈太師諡文定

明史一百九十三 雍正志
云春芳著有貽安堂集十卷

汪道昆字伯玉江都人歙籍嘉靖二十六年進士由知
縣歷官福建兵備道福寧兵變道昆單騎入軍門斬首

事者以徇一軍皆肅四十一年倭陷興化全閩大震道

昆走浙乞師總兵官戚繼光將兵八千赴援於是道昆
主謀繼光主戰諸賊次第削平以功擢按察使特勅盡
護諸道軍陞僉都御史開府閩中海寇殲無孑遺未幾
罷隆慶中起爲鄖陽巡撫晉副都御史調撫湖廣歷改
元召爲兵部侍郎奉命巡邊裁革冒濫兵餉歲省浮費
二十餘萬終養歸道昆以詩文名海內與太倉王世貞
並稱南北兩司馬著有太函集家傳
王陳策字師薰泰州人嘉靖二十六年進士兩爲令歷
官工部郎出守廣信傷夏文愍遇害訪有一子在襁褓

義僕竊逃得脫寄寺為僧策托故往訊已十四齡矣即與至衙齋集鄉紳曉以大義隨出之座時有許姻者策納幣擇日為成婚禮攜遺孤詣文愍家廟具文以告事

載廣信生祠碑中 泰州志

李茂功字季成春芳季子以中書奉命封衡藩却餽遺權北新關汰冗稅罷羨金擢知興化府出俸金築木蘭

陂隄民獲灌溉利平反疑獄數十事 江南通志 李維楨墓誌云茂功在

興化時祀理學名臣八人表節孝士女三十人天久旱毀服步禱乃大澍三禱皆如之慮囚尤愼有少年羣不逞詐而過市或目之曰將日虎日地煞邑令喜事知非茂功所欲私告變臺使者捕其黨數百人繫獄檄茂功案狀茂功曰嘻屠沽兒醉飽得過惡足

宗臣字子相興化人由刑部主事調改功謝病歸築室

百花洲上讀書其中起故官移文選進稽勲員外郎嚴

嵩惡之出為福建參議倭薄城臣守西門納鄉人避難

者萬人或言賊且迫曰我在不憂賊也與主者共擊退

之尋遷提學副使卒官士民皆哭 具明史二百八十七

云楊繼盛劾嚴嵩以冤死臣率同舍郎解袍覆其尸為文哭之嵩慙恨出臣福建參議會倭寇福州撫臣被逮三司共議城守令臣監西門先是有司悉部勒父老子弟守陴臣至悉罷去無用者簡壯士嚴守會報寇至六門咸閉城外數萬人呼求入城臣開西門坐詰而入之復檄召城外百里所蓄薪穀悉徙之城中新穀日以萬焚之壯夫不肩薪穀者不得入於是城中薪穀日以萬計時有議毀城上屋以便擊賊臣力止不毀寇攻西門臣多製火藥中之相戒不敢犯西門未幾賊寇興化其未寇鎮東者尚屯海上適臣所部兵二千入自他郡入

援合撫臣兵數千要擊之斬獲殆盡沈賊船數十於海中是歲八月泰寧報粵寇急臣卽檄延邵縣兵夾勦而身與數騎馳赴之四面設伏遇其衝突賊由歸化走粵臣督數百騎徑趨白蓮賊逼永安又蹴之永安擒斬數十人追至百里外是役也犯霜露冒戈戟筭無遺策爲巡撫所倚重陞按察司副使提督閩學以勞瘁得疾卒於官臣才高氣雄爲郎時與濟南李攀龍太倉王世貞長興徐中行南海梁有譽武昌吳國倫臨清謝榛稱中原七子有詩文集十五卷

金汝礪字良佐高郵人嘉靖三十一年舉人以親老就

銓授汝寧同知調永寧永寧世爲蠻夷長官地號難治

礪至體恤民隱久而安之時普方稱亂檄討之至則單

車詣壘譬以禍福悉解散獲其魁首以歸方議功會世

宗大漸奉進香差便道歸省聞父喪痛絕嘆曰吾恨不

及面吾父而忍更去吾母哉自是不復有仕進心志

張瞻字惟慎高郵人經之子嘉靖三十五年進士擢御

史前後六年務持大體不事搏擊聲望日著巡京通倉

劾錦衣督運官貪暴不職者巨璫爲請拒弗聽又疏奏

馬政五事戎政六事及杜吏姦廣積儲所論皆關利害

初按貴陽時送嫡母尤歸里母塗中疾故扶櫬渡淮值

風大作鄰舟多溺瞻撫棺痛哭顛天頃刻波平人以爲

孝感奉命查剔南京畿道文案卒於官著有尙書管見

若干卷雍正志

李承式字敬甫先世自大同遷江都嘉靖三十五年進

士初任浙江錢塘縣以執法忤齷使者調直隸深澤除
奸吏稱神明擢兵部主事上封事八條皆報可尋備兵
榆林法令嚴整壁壘一新陞陝西布政使病辭歸會倭
犯朝鮮以承式有邊才召用多立軍功陞福建左布政
使尋致仕惟汙萊數頃以供饋粥築室湖上扁舟往來
足不履城市卒祀鄉賢

雍正志

顧廷對字子俞泰州人嘉靖三十八年進士授浙江平
湖縣減驛馬復塘長酌開河事宜一時稱便擢御史不
避豪貴先是宣德時以宣城逼山多虎傷馬暫令泰州
寄牧馬千六百五十四匹久爲民害宏治間諸權爲大畿
奏蠲馬八百匹及廷對視馬政奏蠲種馬之半鄉人德
之後巡按江西卒於官

雍正志

張守中字裕齋高郵人縉之子嘉靖四十一年進士授
工部主事奉命造重城再修京庾督工永陵賜金幣改
虞衡司郎中分署遵化鐵冶墾田數百畝教以桔槔歲
得穀數百斛以給冶人又城白冶以防邊上嘉獎之陞
浙江按察司副使飭兵溫台時海上戍卒數月不得糧
畝洵洵守中至盡給之島夷曠賊不時竊發守中計擒
其魁巡按御史以不卽上功劾之調官貴陽丹平苗夷
叛守中率諸路兵張左右翼攻之斬獲無算巢穴蕩平

督撫上功第一代督者為讒所構中以他事當再調守
中日吾已投荒萬里猶不理人口耶遂投劾歸咸為扼
腕上嘉丹平功賜金幣於家屢薦不起

雍正志

凌儒泰州人官御史嘉靖間疏請重貪墨之罰革虛冒
之兵搜遺佚之士因薦洪先陸樹聲吳嶽吳悌帝惡其
市恩除名

具明史二百七楊思忠傳

羅應鶴字聞野江都人歙籍隆慶五年進士由知縣行
取御史巡按廣東時蛋戶之獄釋纍囚數千人累遷太
僕卿巡撫保定提督紫荆關東明長垣河隄成賜金幣
以父憂去優游林下四十餘年年九十一卒贈戶部侍郎

郎祀鄉賢傳

陳應芳字元振泰州人萬曆二年進士歷浙江龍泉松
陽令民為立碑建祠設生像入名宦遷禮部主事教習
駙馬都尉以壽陽公主婚禮愆時發左右欺蔽狀典山
西試所拔如傅新德韓爌趙用光皆表表者出為鞏昌
府丞遷僉事督學浙江攝閩藩積羨若干繕籍為正需
遷南大理丞當入賀上敬天師古法祖勤民一疏遷太
僕少卿條馬政八議悉允行乞歸後力爭以正改兌與
鳳陽代糧二事其詳鉅敬止集中又有守愚歸來日涉
園諸錄天啓四年祀鄉賢

家傳

沈道隆字念毅泰州人承祖蔭任南戶部照磨得楚黃
豪掾贓狀論治如律出判慶陽舊例軍需皆取給鹽課
道隆條上十七議軍商便之調夔州上疏白祖司馬公
論劾嚴嵩狀復原官移饒州同知擒巨盜數人箠殺之
徙慶陽引河灌田令民芟牧河水溢開渠築隄邊人德
之秦州志

袁應祺字肖海興化人萬曆二年進士授戶部主事先
是興邑糧三萬石有奇以鄰邑奸民誣訐欺隱溪湖港
蕩咸視田稅增糧至二萬石知縣歐陽東鳳重憫民困
抗疏叩闕應祺在部昌言於朝力請大司農乞如東鳳
奏得改折銀一萬兩民以稍蘇擢昌平道未任卒於京

邑人德之立祠祀焉

雍正志

李植字汝培江都人承式之子萬曆五年進士改庶吉
士授御史十年冬張居正卒馮保猶用事植發保十二
大罪帝震怒罪保明年巡按畿輔請寬居正所定百官
乘驛之禁從之擢太僕寺少卿廷臣忌植適帝用禮部
尚書徐學謨言將卜壽宮於大峪山植扈行謂其地未
善欲偕江東之疏不果明年植還朝會爭御史丁此呂
事及論學謨卜壽宮之非與申時行等相拄卒被斥貶
知綏德州疾歸居十年起知沅州累官右僉都御史巡

撫遼東墾積土得田四萬畝歲獲糧萬石戶部推其法於九邊又奏稅監高淮貪暴請召還不報後乞休家居卒贈兵部右侍郎

明史二百三十六

朱希禹字砥中江都人萬厯間以貢入太學授浙江新昌縣民桀驚難治希禹不事鞭笞一以至誠化民踰年民大悅服以勞瘁致疾卒之日邑人罷市比喪歸擁輻送者幾萬人

雍正志

張肖孫字克甫江都人祖鎧嘉靖間輸粟千石助賑江淮詔旌以官肖孫萬厯四年舉人授江西上猶縣再宰南平俱疲邑難治而能化其刁悍以循良稱官至長沙

郡守

雍正志

章潤字實甫江都人萬厯五年進士授浙江安吉州州故確瘠民悍難治潤廉敏通達因俗而導民以帖服陞刑部員外郎著律例贅言若干卷陞瑞州府會歲飢盜起潤擒捕其渠餘悉逃竄境內以安陞四川按察副使備兵松潘甫至幕下騎士謀作亂潤廉得其主名陰授方畧擒斬之陞廣東右參政卒於官

雍正志

所平反陞登萊道備兵雁門巨寇柳廷瓚倡亂以計平之晉山西右布政使以勞瘁卒於官

雍正志

馬一駿字強吾江都人以選貢授四川安縣初至以前宰闕茸吏侵庫帑逾萬株連追取邑無完家一駿惻然憫之會臺司察其能委運松潘例有羨費駿曰是可藉手矣盟諸神以羨金補庫三年而侵帑報完株連悉免以卓異薦陞河曲知州安人祀之名宦

雍正志

邱覺民字莘野高郵人太學生授浙江常山縣丞敦樸無偽介而不苟令缺署篆一載以剩夫銀千八百兩請

糶粟賑飢有活萬餘人課鹽例有羨入盡蠲之當事廉

其賢薦陞王府紀善邑人祀之名宦

志

盛稔字伯豐儀真人萬厯十四年進士授戶部主事權溥關以廉覈歷遷正郎出知山西平陽府時站銀編額三十六屬率多匱乏稔查庫積七萬八千餘金蠲代之以蘇民困三藩祿羨約數千金皆不納但識原封發之巡按以其事聞特旨紀錄擢東萊兵備道值倭寇山左稔為備甚嚴蓄硝黃萬餘石倭平遷井陘參政嚴勾稽增堡壘內控三關外禦九寨紆神京左臂憂有同年隸屬者怨請囑不遂講讒陷之例改調稔遂歸後褒前勸賜金綺於家復起用終堅臥不出惟杜門著書而已既

歿二十餘年有寇攻東萊甚急賴稔所儲火藥退之奉
旨追叙入萊郡名宦季子自今以諸生應例授河南修
武縣丞張伯鯨督師武昌延入幕府參贊遇賊難死義

雍正志

李茂德興化諸生春芳子授中書懋順天府治中有富
人謀陷其兄大璫爲居間茂德發其奸置之法擢寶慶
知府會全楚大祲捐資倡士民賑濟開倉廩庀醫藥全
活數十萬人有嘯聚爲盜者立賞格殲其渠魁一境以
安遷山東運使離使者意操切商大困茂德請平引價
時徵解緝興販條數萬言上諸部院施行屢舉鄉飲大

賓興志

李長科一名盤字小有興化人萬厯中兩中副榜以賢
良方正辟授安徽懷集縣善政載牧懷紀中曾游燕趙
阻兵廣平與守土者棲宿雉樓四十晝夜畫奇制勝圍
解著有金湯十二籌遺民廣錄廣仁品諸書行世

家傳

宗名世字良弼興化人萬厯十七年進士知直隸肥鄉
縣肥故患水名世築隄捍之陞工部營繕司主事權荆
州稅荆夙號利藪胥吏與賈人爲姦稅多不及額名世
并心爬梳積弊頓清忌者以法中之奪職去後長子萬
化任景州知州上書稱寃復其官萬化中三十七年舉

人在景以三千兵撲滅白蓮賊范閣學景文勒其事於石久之補鞏昌同知遷潮州卒當名世之官於浙也洎筆橋夢偉丈夫自稱江淹授以筆三日使爾子姓以文名者三世及名世少子灝登崇禎十六年進士萬化子元豫亦博學工著術如其夢名世著發蒙史畧一卷含香堂文集十卷藏於家

興化縣志

劉學詩字全言儀真人生有異質父大綱奇之爲諸生時卽以氣節自勵由萬厯二十二年舉人官太原司理徙衢州案無留牘時上官有門役新婚遇強暴無主名獄不能決下司理詩夢一舟張帆於柳上醒而悟曰得非楊鵬乎索其人掠治之乃白詩行取湖廣道御史歷

考明之乙榜官侍御者獨詩一人

儀真縣志

徐天寵江都人萬厯二十二年進士授直隸正定縣五官並用饗殮皆在廳事擢工部主事去之日囊橐蕭然士民擁塞至不得行

畿輔通志

徐霖字潤海興化人六歲而孤性孝友兄姪爭產推已橐解之中萬厯二十五年舉人著有經傳疏解未仕卒崇禎末下令褒揚真孝廉贈官賜諡鄉人僉推霖提學御史宗敦一疏聞以甲申國變命未下

興化縣志

蕭灼如字茹一江都人由選貢授廣東潮州通判職司

糧民多逋賦灼如盡爲請免歲飢捐賑存活甚衆巡按周應期知其才所至以灼如從有疑難詢之立剖潮關有稅亦命代理灼如設匭中庭令自投不問羨餘巡按益重之將疏薦會灼如以積勞得疾告休卒祀鄉賢

雍正

志

李思誠字次卿興化人春芳孫萬厯二十六年進士改庶吉士授編修出爲福建屯鹽道時權璫高竊橫暴激民變思誠挺身諭衆亂乃定遷溫處道以計擒海中劇賊百餘人有武弁欲叙軍功陞叅戎納千金麾却之陞江西按察使劉忠烈縋以死封疆功應世襲縋子吉幼其弟行金直指謀以弟代襲思誠力持不可以去就爭卒與吉進浙江右布政使尋內召累官至禮部尙書加太子太保逆璫魏忠賢方用事工部尙書崔呈秀其腹心也先是建三殿忠賢出省工思誠不與言殿成設宴又用舊制不列忠賢座忠賢大慚恨會有懷來兵備邱志充者以三千金屬呈秀謀轉京卿跡露下東廠忠賢掌東廠欲爲呈秀解脫而方怨思誠卽移其贓於思誠而命許顯純雜治之顯純故駙馬子家富初信王擇妃周后與顯純女俱在選顯純行賄內外事幾就思誠以故事無戚里重姻者力請冊周后顯純銜之至是希忠

賢旨鍛鍊成獄忠賢矯旨奪職追贓中外寃之崇禎初
御史吳尙默等交章奏雪未幾卒著有真懶齋集雍正志

黃建中字良甫興化人萬厯二十六年進士授南陽府

推官甫下車立置一獐掾於法姦吏震懼屬令密餽金

杖其使令即解綬去以艱歸服闋補金華署府事籍羨

餘千金貯之庫代者至以金還建中固拒之留為公費

擢南戶科給事中疏湖州利弊五條上之得旨著為令

復革汰湖役餼資節省繕修諸費積四萬餘金歸於朝

未幾攝兵科尋攝六科有御史致千金於建中家聞之

馳書戒其子令勉為清白吏子孫趣還之在垣知無不

言經畧熊廷弼有邊才中朝黨人以其不附已羣擠之

建中抗疏言廷弼才可任羣臣不得以私鬪悞國事由

是怨者甚眾以內計誣罷後起大理評事轉禮部主事

未至官卒著有留垣諫草雍正志

劉永澄字靜之寶應人年八歲讀文丞相天祥正氣歌

設位晨夕拜登萬厯二十九年進士改順天教授遷國

子監學正雖官閒曹日討論累朝典章名臣言行凡六

曹九邊職事掌故形勢阨塞及兵馬錢穀之數皆得其

要領與顧憲成高攀龍劉宗周文震孟友善座主李廷

機為禮部尙書奉詔條弭災數事永澄規以開言路語

甚切直大學士沈鯉數諮時事永澄引狄仁傑處張昌宗張九齡處李林甫故事權奸聞而惡之時督漕侍郎李三才雖與東林諸正人親善然性豪侈供帳陳設甚盛聞永澄至盡撤之其見憚如此陞兵部職方司主事未任卒震孟爲之狀攀龍誌其墓宗周著淮南賦弔之

雍正志

人物考云永澄卒年三十六著有離騷纂注劉子續言

鄭茂華字實符江都人萬厯三十二年進士由部郎出爲浙江按察副使時溫處多寇茂華至皆望風遜進廣西布政使廉潔不侵一緡時靖藩爭立三司慮變茂華論以大義立解天啓間魏瑞煽虐所在立生祠惟廣西

不應其強項如此崇禎初瑞平卓異召對平臺稱旨陞副

都御史巡撫廣西有土司陰謀起釁茂華指授方畧殲其渠魁諸桀驚者咸遵約束考績晉通議大夫御書天下清官於屏尋擢任兩廣總督以病乞休溫詔慰留者再歸里杜門未嘗營田宅卒贈正議大夫兵部侍郎祀

廣西名宦

雍正志

史啓元字蓋卿江都邵伯人萬厯三十二年進士授南戶部督淮閘稅尋移南吏部天啓初擢湖廣按察副使備兵衡永會岷藩有變中使往勘羣宗譁甚啓元至數語折服遂定岷封粵寇闖入楚境啓元於廣贛孔道設

木蘭臘嶺二關募兵守之賊不得奔逸殲其渠魁脅從
解散境內獲安被病乞休歸臥林下嗜書法臨池不輟
卒祀鄉賢

雍正志

馬呈秀字君實其先大同人隨父業鹽筴籍江都呈秀
早孤嗜學登萬厯三十二年進士未拜官卽疏請終養
服除官大理寺評事凡奏疏諸牘援引經傳同列悚服
出知延安狃賊入禁親督兵捕擊擒其渠魁治延五年
收復流民萬戶墾荒田數萬畝入其租爲民充逋賦尙
書趙彥稱之陞福建按察副使擒礦盜有功祀福建名

宦 雍正志

吳一瀾字觀瀾儀真人萬厯間邑大饑縣令募富室輸
濟多不應瀾適自楚市米歸急白令曰某有米千石願
以米半供賑令曰不繼柰何瀾曰眞卽距楚遠乘風上
下月可達也但得母錢廣糴以子米利民亦易耳富者
感動共集得官民錢若干瀾周迴糴糶存濟無算子明

德有文名

儀徵續志

王繼美字元玉興化人萬厯三十二年進士知福建順
昌縣縣居劍州上游山水暴發漂民舍動至數千家繼
美多造舟募善水者救援無算以忤巡按罷歸久之補
江西貴溪縣又以失撫臣指謫松江府學教授進南雍

重刊縣志 卷之四十一
助教陞刑部主事轉戶部郎中總理密雲糧餉時遼初
失守人心震驚多不敢進繼美朝聞命夕戒途至密建
議謂海內困於加派宜省冗濫清浸冒以寬民力按籍
稽核剔逃亡得清省銀米二十餘萬并掃除銀三千兩
歸諸朝前後受事者畏其軋已壅不上聞繼美抗言於
部大司農爲之失色京師稱羨郎中云科臣解學龍疏
稱繼美視國如家宜優擢爲賢者勸超授山東布政司
參議備兵充東東齊久經白蓮賊蹂躪繼美念捕者以
斬級爲功率多無辜檄郡縣吏殲渠魁其脅從悉原之
與大吏主勦議不合疏調簡繼美自以通籍久不得行

其志徑拂衣歸卒於家

續正志

朱家民字同人江都人以祖戍滇南遂家曲靖萬曆三
十四年舉雲南鄉試授四川涪州天啓二年官貴陽府
安邦彥反圍貴陽家民乞援兵解其圍撫傷殘招流移
寬徭賦遠邇悅服丁父憂奪情擢安普監軍副使加右
叅政崇禎時就遷按察使左布政以平寇功加俸一級
久之致仕卒於家自邦彥始亂雲貴諸土酋盡反攻陷
安南等十六衛雲南路斷其後路雖通羣苗猶出沒爲
患家民率叅將許成名等討平盤江外阿野魯頗諸寨
於是相度盤江西坡板橋海子馬場諸要害築石城五

宿兵以衛居民帝嘉其績皆錫以名家民又於其間築城六廨舍廬井畢備羣苗惕息道途宴然盤江居雲貴交兩崖壁立水深無底廣三十餘丈家民仿瀾滄橋制置鐵索鐵柱橫木爲橋建鼓樓築月城以護之遂爲永利雍正志康熙志云家民知涪州舉卓異轉潮州再移真定舉邊才擢貴陽守爲按察時讞獄多從未減固圍皆空進左布政節省帑銀六萬兩築十一城修山路千餘里崇禎庚辰入覲賜金帛叙功推宣大巡撫以老乞休子潮遠官漳州都督

王納諫字聖俞江都人萬曆三十五年進士授行人出使榮藩辭樂郤餽榮世子敬禮之假歸三載起爲吏部

主事五閱月歷四司復以疾歸而月而逝所著書有會心言三卷自謂倣子雲法言如云言傳耳則溢書傳本則譌莫神於不忒而怪奇爲下百工有異巧而觀者舞悅造物尤異巧而觀者相忘悅之以其淺忘之以其深聽開竅於耳視開竅於目聰明之體不容不達是以決離隱密而見其章光亦猶花欲放葢自破草欲生土自穿擲瓦於地四五分裂是漫也非道也梅之花五出雪之花六出終古如斯是道也非漫也繇氣爲蟲精氣爲人繇氣爲葉精氣爲花花必五出葉則無算人有禮義物則糝雜鑽核之李不生暇卵之雛不成均之乎殘其天者也天道如車轂往則自返人情如奔駒逸則不還

鑽木得火敲石得火未鑽未敲火復何有或謂火無自體非也芒刺入體甚者成創創久氣復必出其刺蓋非吾體者自拒而不納也兒多慧老多忘兒多樂老多悲知器不知化譬以石之堅疑水之流禽之制在氣竹雞鳴聲能使白蟻化爲水非以齒牙爪角侵及之也氣足奪之也道勝不祥於此可悟其理水體不頓進亦不頓涸火體則不然燼可倏熾熾可倏燼陰有方而陽不測也擊楫而生波戛於氣也人七尺身居丈室不存其一隅在天下能爲有無精者載之形本貞靜附氣而動氣本屢遷附形而凝氣雖無知敏於百慮余食魚之脊肉纏理而堅其腹肉疏理而柔腹脊相接有一線痕判若刀畫不相涉入因歎氣化分際如此截然如樹之結果自蒂以下是樹分際自蒂以上是果分際故或樹槁而果不知或果落而樹不知白刃如林入而不傷其身者在生分際不與死會也失火四隣爲燼而歸然以其室獨存者在吉分際不與凶會也老莊貴無吾道貴初何言乎貴初也曰訂譎書者返其初本天道主始令終則俟之人雪白必汗花馨必萎紛披狼籍不復恡惜者靈奇能發不能固也觀一樹生意莫如初茁之芽觀一莖生意莫如初葢之花飮不如嘗成不如將染髮不可以

延歲強笑不可以怡神度物者以丈尺度天者以矩表
矩表者通乎丈尺之所窮也易以象教爲言教有窮耳
虛以通乎實之窮律有短長而氣與之應象有奇偶而
道與之存律中度然後氣應禮中節然後神格神如火
光鬼如火燼不穆穆不足以見天地之大也不漠漠不
足以寄天道之神也騶虞與虎狼並生而不妨天地之
仁渾淪殺雜者乃所以爲靈奇博大也龍奮以春蜩鳴
以秋材之微鉅至爲不侔然各當其時則伸不當其時
則詘天道大矣有詘伸無是非人情悵執故貪生怖死
造化以日新爲德迭用生死大定者不小遷命之制也
秋霜殺物不別芝艾天予人半不與人全予以智慮足
以就利避害而又予以不可避就予以精英足以殫見
洽聞而又予以不可聞見天之福常人也逸之福非常
人也勞之鬻之逸不如目之勞也矚無功而上於目心
有智而下於首皆各得其分天不名一巧故算寒暑者
有憑占雨暘者不驗水隨地而制平聖隨物而制正枝
去樹則葉萎命系於彼也果去樹則種存性足於此也
嗜腥腐者味之譌好貨色者性之譌寒氣清肅譌而爲
慘慄暑氣融冶譌而爲鬱蒸故夫洩冶之危言譌而爲
狐咷之哭國而皆忠之譌豫讓之報仇譌而爲荆軻之

劫刺而皆義之譌扶牀而立烏知其非痿也扶杖而行
烏知其非跛也治痿痺者灼之而知痛則喜以其生脉
之猶存也人未有自致者也必也親喪乎此灼之知痛
之類也處女之烈最決孺子之慕最情山叟之愚最愿
惡無心謂之過善無跡謂之文野人之留客也捉其裾
而強之酒士大夫則揖讓而已非士大夫愛客顧不若
野人也亦微著之謂也物欲浸微則浸滅以微爲不足
以著爲有餘道心愈微則愈精以著爲不足以微爲有
餘故用微則物欲日去道心日存至德不妨受垢至明
不妨受欺狷潔德之下也雄猜明之傷也魚脫於網不
脫於淵兔逃於罝不逃於林小知悟悟大道無外以智
鬪智則智日熾以無智容有智則智日亡至孝閭無可
表至治史無可書才之所盡亦道之所止視能見不能
隔垣見也故君子不務能其所不能而務能其所能唯
不能其所至是誠不能自無適有謂之新自有適有謂
之塵瀟灑日夕勝活于齡好名尙勝自得之譌人神躁
則欲離其形交趨炎則欲棄其故成法拚智師心破學
臆而得之鑿鑿如也其味淺學而得之融融如也其味
長江東於峽其流峻士東於窮其學密與智者言可以
悟與愚者言可以習衣旣垢不復護其染也器旣敗不

復防其摧也故君子慎初人盡爲鳳孰爲之雞醫消否
過半則止更投平緩之劑聽其自消恐併傷元氣也故
凡攻伐克治者得半者也法太巧則眾不能行旨太深
則庸不能喻湖大風多事大變多人明我暗以暗距明
其恚猶淺我明人暗以暗激明其恚更深欲人我相安
也雖明勿執權應乎天非徇乎人聽於無情不聽於有
情吏宜其民猶罔宜其馬又著周易翼注三卷四書翼
注六卷初日齋集七卷評選之書有左國腴古文啓秀

蘇文小品若干卷

焦循北
湖小志

賈先春字汝後高郵人萬曆三十五年進士授山東德
平縣時苦旱蝗流民載道先春招集流亡墾闢荒土民
賴以安折獄平允久之囹圄空虛調浙江秀水縣按臣
奏仍留德平民如慶更生考滿授御史與左光斗楊漣
繆昌期相友善舊制內批奏準有不宜行事輒令科臣
封駁時久革不行春上疏請復封駁並禁宦官不許識
字一依洪武故事尋卒楊左諸人爲之殯得扶櫬歸里

雍正
志

陳崇虞字中孚興化人萬曆三十六年舉人授山西浮
山縣行取南京刑部主事轉員外郎郎中出知臨洮府
陞臨鞏兵備副使祀名宦鄉賢

興化
縣志

韓斐泰州人由御史知處州興學校培士氣枯之東鄉

大堰久塞斐捐俸修築民感其惠陞山東叅政浙江通志

秦丹高郵人萬厯間由鄉貢任撫州府通判矯卓不羣

三署篆皆分毫不染所歷有聲一日視廳事置筆奄逝

署中僅一老僕笈中惟遺銀四兩合郡哀之江西通志

李茂英字君秀寶應人萬厯三十八年進士授江西分

宜縣調清江邑大水自贛江達淪水決百餘里民不得

耕茂英發常平粟賑之又請減田租民猶飢甚數鼓譟

諸大姓將為變茂英懇諭富人出粟貸飢者俟成熟官

為贖民始定富人獲全遷順德同知歷刑部郎中嘗

恤刑測江平恕多所全活有以賄求未減者不許擢通

政司右叅議轉右通政會魏忠賢害諸正人遂乞歸雍正志

吳甦字鹿友興化人萬厯四十一年進士歷知邵武晉

江灘縣天啓二年徵授御史初入臺趙南星擬以年例

出之甦乃薦方震孺等而追論崔文昇李可灼罪遂得

留後又諫內操宜罷請召還鄒元標馮從吾文震孟乃

積與魏忠賢忤七年削其籍崇禎改元起故官温體仁

許錢謙益周延儒助之甦恐帝即用二人言枚卜大典

當就廷推中簡用事乃止時大治忠賢黨又值京察甦

言此輩罪惡非考功法所能盡宜先定其罪毋混察典御史任贊化以劾體仁謫牲論救而力詆王永光媚璫請罷黜皆不納出按河南妖人聚徒劫村落牲遍捕賊魁誅之奉命賑延綏饑因諭散賊黨帝聞卽命按陝西劾大將杜文煥冒功置之法數爲民請命奏無不允遷大理寺丞進左通政七年九月超擢右僉都御史巡撫山西牲歷陳防禦邊寇練兵恤民四難及議兵議將議餉議用人四事每歲暮扼河防秦豫賊連三歲無一賊潛渡以閒修築邊墻八年上疏言晉民有三苦一苦凶荒無計餬口一苦追呼無力輸租一苦殺掠無策保全由此悉爲盜請蠲最殘破地十州縣租帝卽敕議行戶部請稅間架牲力爭弗聽其秋我

大清平察哈爾國旋師畧朔州直抵忻代守將屢敗總督

楊嗣昌遣副將自代州往偵亦敗走牲鑄五級嗣昌及大同巡撫葉廷桂鑄三級俱戴罪視事先是定襄縣地震者再牲曰此必有東師也飭有司繕守具已而果入定襄以有備獨不被兵山西大盜賀宗漢劉浩然高加計皆前巡撫戴君恩所撫擁眾自恣牲陽爲撫慰而密令參將虎大威劉光祚等圖之以次皆被殲牲行軍樹二白旗脅從及老弱婦女跪其下卽免死全活甚眾在

晉四年軍民戴若慈母謝病歸十一年起兵部左侍郎
其冬尚書楊嗣昌言邊關戒嚴牲及添注侍郎惠世揚
久不至請改推帝怒落職閒住十三年冬起故官明年
命協理戎政帝嘗問京營軍何以使練者盡精汰者不
譁牲對曰京營邊勇營萬二千專練騎射壯丁二萬專
練火器廩給厚而技與散兵無異宜行分練法技精者
散兵拔爲邊勇否則邊勇降爲散兵壯丁亦然老弱者
汰補革弊當以漸不可使知有汰兵意帝然之又問別
立戰營能得堪戰者五萬否牲對京營兵合堪戰承平
日久發兵勦賊輒沿途僱充將領利月餉游民剽掠
歸營則本軍復充伍今練兵法要在選將有戰將自有
戰兵五萬非難但法忌紛更不必別立戰營也帝顧兵
部尚書陳新甲令速選將而諭牲具疏以聞賜果餌拜
謝出十五年擢禮部尚書兼東閣大學士十六年帝以
襄陽荊州承天連陷召對廷臣隕涕謂牲曰卿向歷巖
疆可往督湖廣師牲具疏請得精兵三萬自金陵趨武
昌扼賊南下帝方念湖北覽疏不悅留中牲請面對帝
御昭文閣諭以所需兵多猝難集南京隔遠不必退守
牲奏左良玉跋扈甚督帥嗣昌九檄徵兵一旅不發臣
不如嗣昌而良玉踞江漢甚於曩時臣節制不行徒損

威重南京從襄陽順流下窺伺甚易宜兼顧非退守大學士陳演言督師出則督撫兵皆其兵姓言臣請兵正爲督撫無兵耳使臣束手待賊事機一失有不忍言者帝乃令兵部速議發兵尙書張國維請以總兵唐通馬科及京營兵共一萬畀姓又言此兵方北征俟敵退始可調帝命姑俟之姓屢請帝曰徐之敵退兵自集卿獨往何益踰月延儒出督師朝受命夕啓行蔣德璟謂倪元璐曰上欲吳公速行緩言相慰者試之耳觀首輔疾趨可見姓卒遲回不肯行部所撥唐通兵演又請留云關門不可無備姓不得已以五月辭朝先一日出勞從騎帝猶命中官賜銀牌給賞越宿忽下詔責其逗遛命輟行入直姓惶恐兩疏引罪遂許致仕旣行演及駱養性交構之帝益怒遣戍金齒南京兵部尙書史可法馳疏救不從明年行次南康聞都城變未幾福王立於南京赦還復故秩吏部尙書張愼言議召用姓爲勛臣劉孔昭等所阻國變後久之卒於家

明史二百二十五

解學龍字石帆興化人萬曆四十一年進士歷金華東昌二府推官天啓二年擢刑科給事中遼東難民多渡海聚登州招練副使劉國縉請帑金十萬賑之多所乾沒學龍三疏發其弊國縉遂獲譴王紀忤魏忠賢削籍

學龍言紀亮節宏猷宜召寘廊廟失忠賢意不報已劾
川貴舊總督張我續貪滯漏網新總督楊述中縮朒卸
責帝不罪學龍通曉政務上言遼左額兵舊九萬四千
有奇歲餉四十餘萬今關上兵止十餘萬月餉乃二十
二萬遼兵盡潰關門宜募新兵薊鎮舊有額兵乃亦給
厚糈召募舊兵以其餉厚悉竄入新營而舊額又如故
漏卮可勝言國初文職五千四百有奇武職二萬八千
有奇神祖時文增至一萬六千餘武增至八萬二千餘
矣今不知又增幾倍誠度冗者汰之歲可得餉數十萬
裁冗吏核曠卒俾衛所應襲子弟襲職而不給俸又可
得數十萬京邊米一石民輸則非一石也以民之費與

國之收衷之國之一民之三關餉一斛銀四錢以易錢
則好米值錢百惡米止三四十錢又其下腐臭不可食
以國之費與兵之食衷之兵之一國之三總計之民費
其六而兵食其一況小民作奸欺漕卒漕卒欺官司官
司欺天子展轉相欺米已化爲糠粃沙土兼濕熱蒸變
食不可咽是又化有用之六爲無用之一矣臣以爲莫
如修屯政屯政修則地闢而民有樂土粟積而人有固
志昔吳璘守天水縱橫鑿渠綿亘不絕名曰地網敵騎
不能逞今倣其制溝涂之界各樹土所宜木小可獲薪

果之饒大可得抗扼之利敵雖強何施乎帝亟下所司而議竟中格稍進右給事中五年九月御史智鋌劾學龍及編修侯恪為東林鷹犬遂削籍崇禎元年起歷戶科都給事中以民貧盜起請大清吏治尋劾薊撫王應豸尅餉激變又上足餉十六事帝皆採納遷太常少卿太僕卿五年改右僉都御史巡撫江西疏言臣所部州縣七十八而坐逋賦降罰者至九十人出數歲之逋責於一歲數人之逋責於一人故終無及額之日也請別新舊酌多寡立帶徵之法可之四方盜賊蠡起江西獨無重兵學龍以為言詔增置千人討平都昌萍鄉諸盜

合閩兵擊破封山妖賊張普薇等賊遂殄滅十一年冬

擢南京兵部右侍郎明年春將解任遵例薦舉屬吏并及遷謫官黃道周帝怒徵下獄責其黨庇行私廷杖八十削其籍移人詔獄竟坐遣戍十五年秋道周召還半道請釋學龍不聽十七年五月福王立於南京召拜兵部左侍郎十月擢刑部尚書時方治從賊之獄倣唐制六等定罪又有留北俟後定奪與另存再議者乘士英注籍上之且請停刑兪旨褒其詳慎平允士英聞之怒然事已無及大鉞暨其黨張捷揚維垣聲言欲劾學龍朱國弼張孫振等詆其曲庇行私遂削籍學龍歸南都

旋失久之卒於家

明史二百七十五

劉萬春字延之泰州人萬厯四十四年進士授戶部江西司主事管西三倉權崇文門稅仍以羨金上奉歷擢兵部員外郎郎中往例武選一缺自邊帥以下悉納金綺春獨一無所取時吳姓官侍郎疏請王良易名從祀春具應謚名賢二揭謂王良胡獻林春宗臣顧養謙邱度六人又凌儒劉永澄王納諫三人士論避之歷陞浙江叅政溫處道所至有聲

泰州志

袁懋貞泰州人萬厯舉人知南康府勾剔蠹隱飭兵清賦建隄築閘修白鹿洞禮迎主教興起士行陞任去

泰州志

姜士望字宗林儀真人幼以孝友聞兄里望有目眚出人常肩負之中萬厯四十四年進士授中書為相臣葉向高所矧時兩廟覃恩凡誥軸餽遺皆却不受省中舊多藏書士望每搜羅編次之奉使冊德藩王以暑溽狃便裁禮士望力爭之秩滿當遷太宰左右有招致之者不往曰昔人恥為呈身御史我豈為私謁曹郎謝之歸養母喪服闋補稽勳主事遷驗封謂人曰此要津實羶途也吾懼甚遂引疾代者例有酬峻拒之是時大瑞魏忠賢方張璫黨崔呈秀巡按淮南士望以部下曾不一

通門狀崔銜而構之將中以禍卒不能返里清約端恪

布袍蔬食無異諸生

雍正志

倪啓祚字允昌江都人萬曆四十七年進士改庶吉士

授編修同館姚希孟顧錫疇皆重之天啓間逆閹魏忠

賢毒虐善類啓祚方在告聞之憤甚草疏論其奸狀會

遘疾不果上旋卒

雍正志

王相說泰州人由天啓二年進士任袁州府推官明於

審斷惠政甚多擢御史推補督糧叅政崇禎末流寇益

熾相說轉餉無匱左良玉兵南下恣肆淫掠相說委曲

開諭左兵稍戢

袁州府志

李時開字贊白儀真人由恩貢授四川儀隴縣地毘苗

洞俗獷悍難治徵輸尤艱開至以廉正取信於民積逋

有六七載者勸之輸恐後流賊五萬餘驟由漢中奔蜀

抵儀隴儀隴故無城開率士民退保縣後山上壘土石

爲砦凡六日粒皆絕但令取麥花與士民同茹得不死

開猶鞞鞞小帽身率勁民馳射賊中賊始却事平理官

李良基按視求賂開不應以囚有越獄者譖於巡按使

劾之開檄囚囚還按使亦悔然疏已行矣罷歸舟車皆

不能具時故儀真令王抗家居濟之始還閉戶著書撰

毛詩解意三百五篇隴民繪開像祀之有歲事禱則立

應雍正志

魏應星號弁山興化人以副榜授雲南趙州通判署州事土寇犯境庫無寸兵日晡下令家輸鐵一觔竟夜督造達旦戈戟林立賊望風遁署鄧川州鄧城爲蛟嚙遷於山無城郭應星相山之凸坳者削平之勢遂壁立州距鶴慶麗江僅十餘里而古道迂曲行旅終日不得達應星捐金市油豆縱火十餘日夜道遂通往來便之稱

魏公路焉

興化縣志

解學夔字章卿興化人天啓二年進士授福建沙縣巡撫薦治行第一擢吏部主事陞文選郎中銓選維公不

受一錢名傾朝右後爲權要所中調大理寺右寺正恤刑浙江全活者甚衆時有夜餽白金數千金求改重辟者堅却之報政歸圖書一橐而已崇禎四年河隄大決五年又決同御史吳牲合疏入告奉嚴旨重究河臣河隄因之鞏固三十年內七州縣百姓不爲魚者由此也
愍陞廣東兵備副使勦海寇劉香老叙功晉二級以師中積勞成疾告病歸終於家祀沙縣名宦

雍正志

喬可聘字君徵寶應人天啓二年進士授中書時魏忠賢勢方張卽請告終養崇禎改元補前官中書事少日夜與劉宗周黃道周倪元璐馬世奇陳龍正諸人切劘

學問吏部侍郎張捷嘗薦呂純如為本部尙書帝以純如
 如在逆案中不許給事中黃鐘遂薦捷為之可聘乃上
 疏言逆案乃陛下所欽定百世不可改易臣聞道路之
 言羣小方輿金載寶欲翻此案今觀捷舉純如黃鐘即
 舉捷則前言可驗矣羣小猶黨逆於溷濁之世而黃鐘
 獨黨逆於清明之朝捷罪浮於逆案諸人黃鐘又浮於
 捷不蚤折其萌大禍自此始矣疏上可聘聲望大著黃
 鐘迄外轉閣臣溫體仁頗畏忌可聘欲致其到門投一
 刺竟不肯往坐是滯留十年始考授御史陳官守言責
 疏帝嘉勞焉巡按浙江士大夫下訖吏民俱相戒勿犯
 喬御史可聘外剛內和不尙刻礪詭激之行雖與東林
 人往還及臨事是非可否不肯雷同嘗出行舟阻水漲
 求繹夫不得蘭谿知縣盛王贊持手板立雨中大聲言
 民方耕令請代之可聘乘輿冒雨去人疑其怒而可聘
 卒薦之既而可聘緣事降官遂謝病福王立仍起御史
 數言罷厰衛停燕飲君臣交傲以圖中興之治皆不省
 後又上疏論治兵亦不報後棄官歸終於家

汪琬喬御史傳寶

應縣志云可聘嘗自言始讀王文成公全書奉教於劉
 念臺先生知有知行合一之學已又與陳幾亭游知有
 居敬窮理之學晚節讀宋諸儒語錄知有四通入達理
 一分殊之學其後益潛心朱子始知有存養性情主
 無適之學所著有自
 警篇及訓子諸書

黃太元字天侔泰州人天啓五年進士授中書典試陝

西遷戶部主事督餉江北歷陞廣西左布政使所至清

慎忠厚勤於職業泰州志

徐耀字蓼莪泰州人崇禎元年進士知福建龍溪縣勦

海寇劉香老功著八閩歷都給事僉都御史時泰州飛

派鳳米萬石民苦之耀特疏豁免卒贈副都御史雍正志

俞都美字士中江都人由廩例入太學授直隸安州州

同州瘠而多水都美為治隄梁歲飢捐俸以賑攝定興

篆嚴絕苟苴時客氏子弟狂橫里中以幣交都美毀刺

笞其使聞者危之隨乞休歸雍正志

李嗣宗興化人春芳四世孫崇禎元年進士授南昌推

官復孫許六忠祠白鹿洞祠舉徐孺子門人張子遠從

祀清澹臺擢御史第一所奏若屯田水利刑名條議勦

撫失宜諸疏咸奉俞旨差河東巡鹽再差巡按福建修

李忠定祠捐刻冊府元龜進呈差竣仍補臺班國變後

杜門養疴絕意世事著有冷香齋匡山吟諸集弟喬萬

麻四十七年進士授河南靈寶縣調祥符革羨餘贖緩

常例兩邑民祠祀之陞禮部儀制司主事出為山東提

學副使累官至陝西巡撫以劾罷蓋崇禎末年事也興化志

王應元字一之高郵人歲貢生嘗欲爲兄百朋婚娶苦無金時元病疽危甚猶命其子稱貸爲之婚病亦尋愈泗州水發鄉官常居敬挾陵寢爲言議放周橋下流開邵伯金灣三閘入江牛按院將行其說元帥同志謁府司曰牛公之議借口假道夫人假道循路而行行盡則止水假道習坎而止滿而後溢必至決運隄沒鹽場高寶等州縣不可復存矣舒撫院卽爲疏陳牛復抗疏論河臣庸鄙坐視陵寢沮洳上怒奪舒官復差科官張來按其事一時傳言首坐抗議諸生卽有具呈首王應元者元曰前日之事我實倡之卽有害又誰諉耶卒議濬

淮北新河爲洩水計事得寢著有高郵州志十二卷

高郵

州志

姚思孝字永言江都人崇禎元年進士改庶吉士授兵科給事中首陳保固民心一疏言甚剴切又疏糾輔臣奪情罷歸後起太僕寺卿尋晉大理寺卿丁父艱返里思孝在諫垣前後上八十餘疏皆昌言讜論

雍正志

閻汝梅字和陽江都人布政使士選子崇禎四年進士卽署門自戒不預外事授山東陽穀縣居官清慎擢刑部主事初汝梅舉於鄉時知府劉鐸以詩觸魏闈被逮人莫敢往汝梅獨省焉鐸貧爲緹騎所窘歸質百餘金

以贈又勸紳士為助多願輸金不書名汝梅晒曰有不測我獨任之奚慮焉其忠直尚義如此

雍正志

劉永沁字清之寶應人幼尚氣節兄永澄以進士官兵部主事與無錫顧端文高忠憲倡學東林永沁以諸生頡頏其間初御史崔呈秀按淮揚貪殘會忠憲以都御史入京過寶應永沁力言其毒忠憲入臺首劾秀引寶應士人言為據秀懼夜投魏忠賢為假子謀殺正人忠憲死沁幾中危禍會奄黨伏誅乃解縣河決橫流泛濫六州縣當其衝有司漠然沁馳書京師相知言狀乃上疏得請如沁議隄成水患息會明廷行薦舉沁見事不可為而歸晚年志於求道作八觀詩又著孝經餘注

可為而歸晚年志於求道作八觀詩又著孝經餘注

集

韓如愈字唐山興化人崇禎四年進士授貴州安化縣土司安某與總兵殷朝陽有郤誘至家霍其目殷訟於官安輩重賄徧營黔大吏獨如愈叱弗受力請抵法竟削其秩後奏最入都上親策以兵食大計稱旨擢工科給事中督漕江西奏真人張應京不宜賜第京師時論避之陞兵科右給事中時戎政不修而封疆告急如愈巡視京營稽核隱冒無所徇山東總兵劉澤清數失事陰使人刺取兵垣章奏如愈疏發其奸下其人於理澤

清恐走書幣請解如愈詈而麾之澤清大恨後出都澤

清遣麾下要於道遂遇害如愈廉直敢言不畏強禦天

下惜之雍正志 興化縣志云時東林浙黨皆以門戶

相爭如愈大書其堂曰見地一分南北卽是小人脚根不着東西方為君子黨人悚愧

李長倩字維曼興化人春芳曾孫崇禎七年進士性豁

達以忠義自許居官勤敏力鋤強暴初授浙江歸安縣

有貲郎恃姻黨奧援橫於里中民患苦之長倩廉其實

跡捕繫獄權貴請乞書盈案不一啓視巡按御史欲寬

之不從卒抵法在任五年舉卓異第一至京當權者以

前事銜之乃遷主事教習駙馬都尉鞏永固永固殉國

難最烈人以爲稟長倩之教云後長倩以副使視福建

學政亦以憂勤國事而死閩人哀之有奏疏及存懶齋

集雍正志 家傳云南都失長倩同詹事黃道周輩迎

唐王監國上言請速出師晉右都御史督餉抵建寧

知事不可爲飲 醜死年五十八韓宗愈字斗望寶應人崇禎七年拔貢授湖南安化縣

妖民黃邦明叛郡邑震恐宗愈修戰守備募死士用間

出奇計卒擒戮之遷銅仁府同知會諸苗煽亂獲其渠

魁釋而不殺遣歸論黨祗苗患悉平擢知府尋罷久之

歸田里卒雍正志顧士奇字伯常興化人以拔貢授湖南江華縣江華屢

重刊揚州府志 卷之四十七
被賊圍士奇內撫民獠外措兵餉威惠大行賊遂解去
有府吏爲姦誣一薦紳子奪其塋域持府牒下江華士
奇身至其處吏訴曰此有碑記在土中士奇令昇碑來
破之又令昇土中他石來亦破之曰此濕彼燥殆爾埋
之土中耳吏卽首伏時寧遠永明兩令皆貪墨與士奇
同謁巡按巡按命左右解兩令印以授士奇攝其事兩
令愧欲死而士奇廉能之聲震於全楚母喪去任三邑
之民號泣馳送百餘里服闋補浙江太平縣未任卒著

有檀兮樓集

雍正志

徐葆初字元赤江都人崇禎七年進士例授部主事以

親老乞改南工部時流寇毀鳳陽陵寢尅期復建估費

四十餘萬金工部尙書劉定國疏薦葆初督工役未三

載竣工止費二十餘萬朝廷嘉其廉幹擢郎中

雍正志

宮繼蘭字貞吉泰州人崇禎十年進士授工部都水司

主事時建烽臺重城眾皆退避大司空劉遵憲知繼蘭

才望委以專督節簡甚多視河夏陽倡議築城卒如其

議出知兗州府充爲藩封重地繼蘭嚴於立法親族莫

敢僥清宿逋錢糧至二百六十三萬有奇當事欲薦繼

蘭備兵兗東以母老請養歸踰二十年復起羅定兵備

不赴卒於家祀鄉賢及兗州府名宦

雍正志

金奇選字幼常江都諸生父玉節遭兵亂伏護母柩時
奇選方九齡跪泣持卒刃卒曰小兒不畏死耶掠之繫
馬上憩城南善慶菴菴僧先夢神語救小孝子及見奇
選因爲卒述其夢卒遂捨而去僧訪送其家及長力學
尤得力於孝經小學性理三書束身圭璧粹然無遺行
與父玉節同祀鄉賢子門詔乾隆元年進士改庶吉士
殿詔康熙四十四年舉人江都縣志 奇選妻早歿不
再娶子女皆弟彥選撫育之
彥選勇於爲義如曠八旗被掠之子女及
賑水旱諸舉力倡同志爲之歿祀鄉賢
鄭俠如字士介其先歛人徙於揚遂隸江都俠如才藻
過人官工部司務時有奏開煤山者執政持兩可俠如

以爭利擾民力請已之又工曹所屬器甲日久多窳敗
俠如捐資整飭一夕頓新大司空異之謝職家居杜門

課子以孝友端方爲鄉里推重祀郡鄉賢江都縣志

許明賢字仲容先世自歛徙揚遂家焉性至孝親意少
不愜輒露立永夜不就寢嘗隨父歸歛展墓潛然出涕
伏臘祭祀器具必親生平素行善如賑饑焚券完人婚
嫁勇爲之不倦明末率諸子避地金陵見所攜載時文
曰此無益悉沉之江命子姪箋經輯史纂述名臣奏議
以備異日實用三舉鄉飲大賓祀府學鄉賢江都縣志
黃萬爵字儀蕃儀真人本衛指揮使廉幹多材督徵衛

糧戶樂輸將時流寇猖獗爵董修垣塘嚴謹啓閉民賴以安爵德器醇厚三舉鄉飲大賓

儀徵續志

毛一駿字際伯高郵人由歲貢知湖北竹山縣縣城兩經寇殘駿赴任就寢民舍賊潛伺謀害夜二鼓聞有婦人呼救乃登舟得免撫恤彫疲曉勸大義張獻忠賊黨陶洪先等負險肆虐一鼓殲除環山多虎患曰此豈官吏貪汚所致耶懸示國門曰官有貪婪者虎食之吏有奸猾者虎食之民有不安本業者虎食之患遂息崇禎十二年賊眾復叛駿被圍十有七日僕毛大漢毛人秋成被殺賊斷水道六七日渴待斃塞上有關帝廟駿往虔禱是夜大雨如注圍解閣部楊嗣昌督師抵郟令兼知房谿二縣事以久官亂地大得民心手勅優勞之襄藩破閣部自縊駿亦名挂彈章歸卒於家

高郵州志

呂道泰字伯父儀真人倜儻多智畧明末黃得功駐儀真道泰往慷慨陳辭得功大說日留幕中資計畫時高傑駐揚州與得功不協得功奮欲擊之道泰謂方今張獻忠擁賊數萬南侵顧不亟引兵救禦而先爭私忿非義也得功悟因率兵禦賊大敗於滁州賊由全椒奔潛山日夜追之復敗於桐城凡賊所經地不敢擾犯雖得功威力實道泰贊勉之力居多未幾得功中飛矢死道

泰大慟曰國家柱石已傾事不可為矣遂卒於家

儀徵續志

王玉藻字質夫江都人納諫子崇禎十六年進士授浙江慈谿縣子良和平民不擾而事畢集未期年北都亡故少詹項煜以從逆亡命慈之馮元颺與玉藻皆出其門馮氏匿之夾田橋之別業慈之義民不容撲之橋下玉藻不問或以為過玉藻曰吾不能為向雄之待鍾會也夫君臣之與師友果孰重聞者聳然時浙中守令或棄官去否則降玉藻獨與沈宸荃起兵晉御史仍知縣事募義勇請赴江上自効乃解縣事以兵科都給事往軍前任事江上諸帥惡之不予餉玉藻曰是將刺刃於

我也乃力請還朝在垣中雅持正議又不為諸臣所喜求罷歸莊太常元辰留之浙東再破玉藻黃冠行遊於剡溪資糧俱盡慈民及浙東之義士時時周之妻收遺秉子拾墮樵不以為苦八年始歸故鄉卒以窮死子二

方歧方魏

北湖小志

重修揚州府志卷之四十七

